


全五代詩
附補遺

七





全 五 代 詩

附 補 遺

(七)

李 調 元 編



叢書集成

初編

主編者
王雲五

商務印書館發行

全五代詩卷三十九

南唐

陳 昶

昶閩人。隱廬山三十年。李璟聘至。授以江州曹掾。固辭。賜粟帛遣還山。年七十五卒。

十國春秋。昶苦思於詩。得

句未成章。已播遠近。學者多師事之。元宗召見。獻景陽宮懷古詩。元宗稱善。吟窗雜錄。昶咏蟬云。年年聞爾者。未有不傷情。畫虎云。入夜雖無傷物意。向明還有動人心。又有句云。出得風塵者。合知岐路人。又云。拂榻燈未來。開門月先入。忽生雲是匣。高以月爲臺。

景陽臺懷古

景陽六朝地。運極自依依。一會皆同是。到頭誰論非。酒濃深遠慮。花好失前機。見此尤宜戒。正當家國肥。

江 爲

爲宋州人。避亂家建陽。遊廬山。師陳昶爲詩。有集。

細素雜記。爲工詩。如天形圍澤國。秋色露人家之句。極膾炙人口。少遊江南。題白鹿寺詩云。吟登蕭寺梅檀閣。醉倚

王家玳瑁筵。後主見之曰。此人大是富貴家。而劉夜坐夏江城等。並就傳句法。後以讒死。今建陽縣之西七里。有靖安寺。卽爲故居。留題者最衆。南唐書。爲題白鹿寺詩。元宗稱善。由是放肆。自謂俯拾青紫。乃詣金陵求舉。屢黜于有司。爲快快不

能自己欲東亡。遂會同謀者。上變伏罪。楊徽之哭江。爲詩云。廢宅寒塘水。荒墳宿草煙。五代史補。爲在福州。有故人欲投吳越。爲與草表。事發并誅。臨刑詞色不撓。賦詩云。街鼓侵人急。西傾日欲斜。黃泉無旅居。今夜宿誰家。紫桃軒雜綴。江爲詩。竹影橫斜水清淺。桂香浮動月黃昏。林君復改字爲疎影。暗香以咏。梅。遂成千古絕調。詩字點化之妙。譬如仙者。丹頭在手。瓦礫俱金矣。

觀山水障歌

適來一觀山水障。萬里江山在其上。遠近猶如二月春。咫尺分成百般象。一岩嵯峨入雲際。七賢鎮在青松裏。潭水澄泓不見波。孤帆幌漾張風勢。釣魚老翁無伴侶。子然此地輕寒暑。灘頭坐久髻絲垂。手把魚竿不曾舉。樹婀娜。山崔嵬。片雲似去又不去。雙鶴如飛又不飛。良工巧匠多分布。筆頭寫出江山頭。垂柳風吹不動條。樵人負重難移步。

旅懷

迢迢江漢路。秋色又堪驚。半夜聞鴻雁。多年別弟兄。高風雲影斷。微雨菊花明。欲寄東歸信。裴回無限情。

江行

越信隔年稀。孤舟幾夢歸。月寒花露重。江晚水煙微。峰直帆相望。沙空鳥自飛。何時洞庭上。春雨滿蓑衣。

登潤州城

天末江城晚。登臨客望迷。春潮平鳥嶼。殘雨隔虹霓。鳥與孤帆遠。煙和獨樹低。鄉山何處是。目斷廣陵西。

岳陽樓

倚樓高望極。展轉念前途。晚葉紅殘楚。秋江碧入吳。雲中來雁急。天末去帆孤。明月誰同我。悠悠上帝都。

送客

明月孤舟遠。吟髭鑷更華。天形圍澤國。秋色露人家。水館螢交影。霜洲橘委花。何當尋舊隱。泉石好生涯。

塞下曲

萬里黃雲凍不飛。磧煙烽火夜深微。胡兒移帳寒笳絕。雪露時聞探馬歸。

隨堤柳

錦纜龍舟萬里來。醉鄉繁盛忽塵埃。空餘兩岸千株柳。雨葉風花作恨媒。

劉洞

洞廬陵人。學詩於陳貺。隱居廬山。後主召見。獻詩百篇。有集。

馬書本傳。洞詩長于五言。自號五言金城。後主卽位。詣金陵獻詩百篇。首篇石城懷古云。

云。後主掩卷改容。不復讚其餘者。與同門夏竇松善。貺嘗謂已詩埒買島。洞亦自言有浪仙之體。恨不得與之同時言詩也。金陵受圍。爲詩署于路旁曰。千里長江皆渡馬。十年養士得何人。又云。翻憶潘郎童奏內。陰陰日暮好沾巾。初藩佑表曰。家國陰陰。如日將暮。洞以譏之。南唐書云。夏竇松與詩人劉洞俱顯名。節度使陳德誠以詩美之曰。建水舊傳劉夜坐。螺川新有夏江城。蓋劉洞常有夜坐詩云。百骸同草木。萬象入心靈。又云。孤猿叫落中巖月。夜客吟殘半夜燈。最爲警策。而竇松有宿江城詩云。雁飛南浦砧初斷。月滿西樓酒半醒。又云。曉來羸駟依前去。目斷遙山數點青。皆佳句。調元按。五代詩多散逸。不見全首者甚多。如劉夜坐。夏江城以詩得名。而皆不得窺其全豹。殊爲可惜。其他散見諸書者。片鱗隻羽。殊不忍棄。

附見于此。其他各國俱以此例鈔附。以備博覽。江表志晉王景遂先主第三子。赴潤州鎮。謝錢詩云。路指丹陽分虎節。心存雙闕戀龍顏。又李宏茂字子松。元宗第二子。早卒。追封慶王。有咏雪句云。甜于泉水茶須信。狂似楊花蝶未知。病中云。半聽月在猶煎藥。幾夜燈閑不照書。雅言系述李平關右人。讀武帝內傳云。龍髯已斷嬪嬙老。豹尾不來歧路長。閑書云。聖人無夢夢不到。天道畏盈盈有餘。道山新聞唐鎬李後主宮嬪皆娘。纖麗善舞。後主作金蓮高六尺。飾以寶物。細帶瓔珞。令皆娘以帛繞足。令纖小屈上作新月狀。素襪舞蓮中。回旋有凌雲之態。唐鎬詩曰。蓮中花更好。雲裏月長新。因皆娘作也。鑑戒野錄庸仁傑。全州人。好苦吟。陳德誠出守池陽。仁傑貽詩云。紅旆渡江霞蘸水。青萍出匣雪侵衣。德誠善之。勉之入金陵。會休沐。朝上集昇元寺。酒行。請仁傑賦登閣詩。有句云。雲散便宜千里望。日長斜占半城陰。常贈嘉禾寺僧云。只住此山能有意。向來求佛本無心。時論與之。又高仁短。宣城人。贈宣城宰云。硯貯寒泉碧。庭堆敗葉紅。贈徐學士云。燕掠琴絃穿靜院。吏收詩草下閒庭。叢苑劉吉。江左人。事李主爲傳詔承旨。以忠于所事。歸朝供奉。嘗有刺自稱南人。不忘本也。有詩三百首。目爲釣鰲集。徐鉉爲序。其首篇隱者詩云。一箭不中鵠。五湖歸釣魚。人多誦之。以塞河有方。人口噤。劉跋河。雅言系述。蔣鈞字不器。營道人。與劉洞。陳甫爲詩友。寄柳宣云。因借夢詩過竹寺。學耕秋粟遠郊原。戎昱詩。有一夜不眠孤客耳。主人門外有芭蕉。鈞代答曰。芭蕉葉上無愁雨。自是多情聽斷腸。又陳甫字維岳。吉水人。贈黃岩云。清時不作登龍客。綠鬢閑梳傍草堂。潼江感懷云。一雨洗殘暑。萬家生早涼。村居云。暮鳥歸巢急。寒牛下隴遲。詩史朱繼仕江南縣令。甚疎逸。有詩云。好是晚來香雨裏。擔簦親送綺羅人。李環聞之。處以閒曹。又有僧庭實獻詩云。吟中雙鬢白。笑裏一生貧。環曰。詩以言志。終是寒薄。束帛遣之。撫言任濤。豫章人。詩名早著。有露團沙鶴起。人臥釣船流。他皆仿此。李隲。廉問江西與放鄉里之役。民俗互有論列。隲判曰。江西界內。凡有詩得似濤者。卽與免役。馬書本傳。毛炳。豐城人。入廬山。每與諸生曲講。獲貲。鐺卽市酒盡醉。時彭會好茶。而炳好酒。或嘲之曰。彭生說賦茶三片。毛氏傳經酒半斤。炳聞之。小哂而已。後數年。自署于齋。壁云。先生不在此。千載只空山。一夕大醉卒。十國春秋胡元龜廬陵人。常謁邑令。幃間繪戲珠龍屬。元龜詠之。時令多所。

受貽。元龜題句云。翻身騰白浪。探爪攫元珠。蓋諷之也。馬書本傳。邵拙宣城人。孤峭不撓。博通經史。飲酒常至百盞。有詩三百篇。尚書郎孫邁爲之序。命曰廬嶽集。水曹郎趙慶以詩貽之曰。邁古文章金鸞鷲。出羣行止玉麒麟。時悼其苦學能文。而不得達于名位。或議其詩有萬國未得雨。孤雲猶在山之句。斯爲應矣。南唐近事。黃可南唐進士。字不可。詩句中多用驢字。嘗有獻高侍郎詩云。天下傳將舞馬賦。門前迎得跨驢賓。江南野錄。陳穎南昌縣人。業進士。顧漢祖廟云。項羽英雄。猶不懼。可憐客得辟陽侯。得狂病而卒。詩話總龜。吳淑字正儀。潤州丹陽人。仕南唐爲內史。歸宋薦試學士院。授大理評事。預修太平御覽。文苑英華。累遷起居舍人。職方員外郎卒。有文集。事類賦。江淮異人錄。祕閣閑談。荆南朱昂晚以工侍乞骸骨。真宗賜坐。寵詔留侯。秋涼還。故吳淑贈詩云。漢殿夜涼初閣筆。清宮秋晚得懸車。吟窗雜錄。趙休幸齋。邇同時人。有侍宴句云。金莖來白露。王宇起清風。郡閣雅談。潘天錫南唐時爲省郎。有游古觀句云。風便磬聲遠。日斜樓影長。紀事。王璘與李羣玉相遇嶽麓寺。羣玉待之甚淺。曰。請與公聯句。破題而授之。璘略不佇思。繼之云云。羣玉遂風芍藥花開菩薩面。樓閣葉散野人頭。羣玉遂屈服。

石城懷古

石城古岸頭。一望思悠悠。幾許六朝事。不禁江水流。

許堅

堅字介石。廬江人。有異術。嘗往來廬阜茅山間。李璟時。以異人召不至。後不知所終。郡閣雅談。堅遇酒筵不問。

尊卑遠近必到。乘輿只三五杯便去。性嗜魚。將魚火上旋炙。熟處卽喫。生處復炙。殊不去其鱗腸。每和巾帶入溪澗內浴。度目浸身出水。卽于風日中坐候乾。其衣服多有腥氣。人惡之。或有人與物。忻然而受。將散與貧者。多于夢中吟詩。宿溧陽縣。

靈泉精舍。僧出白字韻請留詩。對榻見其睡熟。至晚起出七言詩。近枕吳溪與越峯云云。太平興國九年。自茅山再遊廬山。于方先生房內安下。至夜深。常與數人談笑。人疑聽。堅已知之。高聲云。不得來。今在洪州西山。或吉州玉笥山。雅言雜載。堅性藪野。似非今之人。年高絕不知曉人事。少言。人不問。終日不啓口。多居三茅山。不知年歲。形容不變。好殮魚。能爲詩。多談神仙事。有題扇詩云。吟哦但寫胸中妙。飲酒能忘身後名。但願長閑有詩思。小溪風月共清明。早年堅以時事干江南李氏。人訝其狂。以爲風恙。莫與之禮。一絕上舍人徐鉉云云。因拂衣歸隱。至今尙在隱迹江淮間。吟窗雜錄。堅有句云。道旣學不得。仙從何處來。又病鶴云。臥久似慵伸雪項。立遲猶未整霜衣。十國春秋。保大時。以異人召堅。堅恥其名不起。題幽棲觀云云。與樊若水善。勉以仕不應。後不知其所在。

題幽棲觀

仙翁上昇去。丹井寄晴壑。山色接天臺。湖光照寥廓。玉洞絕無人。老檜猶棲鶴。我欲掣青蛇。他時冲碧落。

遊溧陽霞泉寺限白字

地枕吳溪與越峯。前朝恩錫靈泉額。竹林晴見雁塔高。石室幽棲幾禪伯。荒碑字沒秋苔深。古池香泛荷花白。客有經年說別林。落日啼猿情脈脈。

題茅山觀

常恨清風千載鬱。洞天令得恣遊遨。松楸古色玉壇靜。鸞鶴不來青漢高。茅氏井寒丹已化。元宗碑斷夢仍勞。分明有個長生路。休向紅塵嘆二毛。

登游齊山

星使南馳入楚重。此山偏得駐行蹤。落花滿地月華冷。寂寞舊山三四峯。

上舍人徐鉉

幾宵煙月鎖樓臺。欲寄侯門薦下才。滿面塵埃人不識。謾隨流水出山來。

譚峭 一作譚紫霄

峭字景升。國子司業洙之子。博涉經史。屬文清麗。洙訓以進士業。而峭酷好黃老書辭。父遠遊。師嵩山道士。得辟穀養氣之術。後入青城山仙去。十國春秋。峭過金陵。見齊邱有仙骨。出化書以授齊邱。齊邱利其書。虐峭以酒醉。裹以革囊投之。淵有漁人剖之。峭

睡正濃曰。吾睡囊中得大休歇。

大言詩

線作長江扇作天。鞞鞢拋向海東邊。蓬萊信道無多路。只在譚生拄杖前。

藍采和

采和不知何時人。常衣破藍衫六銖。黑木腰帶。一腳著鞞。一腳跣行。夏則衫內加絮。冬則臥於雪中。氣出如蒸。每行歌城市。乞索拍大拍板踏歌。似狂非狂。歌詞極多。率皆仙意。以錢與之。或散失亦不顧。見貧人卽與之。多與酒家。後踏歌於濠梁間。酒樓乘醉。輕舉雲中。擲鞞衫腰帶拍板冉冉而去。

踏歌

踏歌踏歌藍采和。世界能幾何。紅顏三春樹。流年一擲梭。古人混混去不返。今人紛紛來更多。朝騎蕭鸞鳳到碧落。暮見桑田生白波。長景明暉在空際。金銀宮闕高嵯峨。

元寂

寂號酒禿高駢族子。

馬令書。寂博極羣書。後主召講華嚴梵行一品。資金帛甚厚。即日送酒家。日夜劇飲。醉則從小兒數十。浩歌道中云云。一日醉死。石子岡。

醉歌

酒禿酒禿何榮何辱。但見衣冠成古邱。不見江河變陵谷。

若虛

若虛南唐僧。隱廬山石室。李主累徵不就。

懷廬山舊隱

九疊嵯峨倚著天。悔隨寒瀑下巖烟。秋深猿鳥來心上。夜靜松杉到眼前。書架想遭苔蘚裏。石窗應被薜蘿纏。一枝筇竹游江北。不見廬峯三十年。

樂仙觀

樂氏騎龍上碧天。東吳遺宅尙依然。悟來大道無多事。真後丹元不值錢。老樹夜風蟲咬葉。古垣春雨蘚

生甄松傾鶴死桑田變。華表歸鄉未有年。

古鏡

軒后紅爐獨鑄成。蘇痕磨落月輪沈。萬般物象皆能鑒。一個人心不可明。匣內乍開鸞鳳活。臺前高挂鬼神驚。百年肝膽堪將比。祇怕看頻素髮生。

文益

文益餘杭魯氏子。七歲依陸州僧全偉落髮。窮儒典。李璟延住報恩寺。賜號淨慧禪師。交泰元年坐化起塔。號法眼禪師。塔名無相。後主命其弟子行言爲導師開法。諡大智藏大導師。十國春秋

木平和尙知人禍福死生。挂木瓶於杖頭。能引瓶自蔽。元宗不能見。慶王尙幼。元宗問壽命幾何。木平書九十一字與之。後慶王得年十九。乃知口其九十而爲十九也。文益有詩云。

覩木平和尙

木平山裏人。貌古年復少。相看陌路同。論心秋月皎。懷衲線非蠶。助歌聲有鳥。城闕今日來。一謳曾已曉。

无則

无則五代時人。爲法眼文益禪師弟子。

鸞鷲

白蘋紅蓼碧江涯。日暖雙雙立睡時。願揭金籠放歸去。卻隨沙鶴鬪輕絲。

百舌鳥二首

千愁萬恨過花時。似向春風怨別離。若使衆禽俱解語。一生懷抱有誰知。
長截鄰雞叫五更。數般名字百般聲。饒伊搖舌先知曉。也待青天明即鳴。

行因

行因居廬山佛手巖。後主召居棲賢寺。

辟寒錄。李氏詔行因居棲賢寺。一夕大雪。逃歸舊隱之廬山。嘗煮茶延僧。托岩扉立化。作偈云云。

偈

前朝詔住棲賢寺。雪夜逃居岩石間。想見煮茶延客處。直緣生死不相關。

謙光

謙光金陵人。一號法眼。

五代史補。謙光素有才辨。李後主禮之。宋太祖將問罪江南。後主用謀臣計。欲抗王師。法眼禪師謙光觀牡丹於大內。因作偈諷之云云。又見冷齋夜話。

賞牡丹應教

擁衲對芳叢。由來事不同。鬢從今日白。花似去年紅。豔異隨朝露。馨香逐曉風。何須對零落。然後始知空。

南唐寺僧

江南野錄。李昇受禪之初。忽半夜寺僧撞鐘。一城皆驚。召將斬之。云夜來偶得月。詩乃云云。李昇喜而釋之。

月

徐徐東海出。漸漸上天衢。此夕一輪滿。清光何處無。

西山僧

中山詩話。洪州西山與滕王閣相對。過客多留詩。有僧覽之告郡守曰。詩無佳者。何不去之。守愕然曰。能作佳句乎。僧即隨口吟云。

西山

洪州太白方。積翠倚穹蒼。萬古遮新月。半江無夕陽。

陳玉蘭

寄夫王駕

夫戍邊關妾在吳。西風吹妾妾憂夫。一行書信千行淚。寒到君邊衣到無。

薛媛

薛媛濠梁人。南楚材妻。

寫真寄夫

雲溪友議。南楚材旅遊陳。受穎牧之眷。欲以女妻之。楚材許諾。因託言訪道。不復返舊。薛媛善畫。妙屬文。微知其意。對鏡圖形。為詩寄之。楚材大慙。遂歸。薛老。里人為語嘲之云。當時婦棄夫。今日夫棄婦。若不逞丹青。空房

應獨守。

欲下丹青筆。先拈寶鏡寒。已經顏索寞。漸覺鬢凋殘。淚眼描將易。愁腸寫出難。恐君渾忘卻。時展畫圖看。

韓續姬

姬失其名氏

全唐詩話南唐僕射韓續請韓熙載撰父神道碑奉一歌妓潤筆文成但敘譜系品秩續乞改竄熙載還其所贈姬因題詩泥金帶而去南唐近事嚴續相公歌妓唐鑄給事通犀帶皆一代尤物兩夜相府有呼盧之會唐適與焉嚴命出妓解帶較勝於一擲六骰數巡唐采大勝唐乃酌酒命所出美人歌一曲以別相君宴罷拉而偕去嚴悵然遣之與此互異

贈別

風柳搖搖無定枝。陽臺雲雨夢中歸。他年蓬島音塵絕。留取樽前舊舞衣。

蓮花妓

妓豫章人

五代詩話陳陶隱南昌西山鎮師嚴字嘗遣妓侍陶陶不顧因求去獻詩云

獻陳陶處士

蓮花爲號玉爲腮。珍重尙書遣妾來。處士不生巫峽夢。虛勞神女下陽臺。

徐月英

月英江淮間妓。有集行世。

全唐詩話月英有句云燈前淚與階前雨。隔箇窗兒滴到明。

敘懷

爲失三從泣淚頻。此身何用處人倫。雖然日逐笙歌樂。長羨荆釵與布裙。

送人

惆悵人間萬事違。兩人同去一人歸。生憎平望亭前水。忍照鴛鴦相背飛。

江南文士

題童氏畫

宣和畫譜童氏江南人莫詳其世系以婦人而能丹青故當時搢紳家婦女往往求寫照焉有文士題童氏畫詩云云

林下才華雖可尙。筆端人物更清妍。如何不出深閨裏。能以丹青寫外邊。

南唐樂人

詩

紫桃軒雜記史稱曹彬下江南不妄殺一人然金陵有樂官山相傳城下之日軍營開宴南唐樂人數輩大慟奏不成曲怒而殺之聚埋此山有南唐樂人詩云云觀此何得稱不妄殺耶

城破轅門宴賞頻。伶倫執樂淚沾巾。駢頭就死緣家國。愧殺南歸結綬人。

南唐漁者

歌

玉壺清話南唐元宗時一漁者持蓑笠綸竿擊短板唱漁家傲其舌爲鳴柳之聲以參之自號回同客人疑爲呂洞賓音情悲如烟波間聽者無厭云云唱於金陵凡半年了無悟者里巷村落皆歌焉元宗果以甲戌二月殂於正寢魚兒乃向所謂

鯉魚也歌中

之語皆驗焉

二月江南山水路。李花零落春無主。一箇鯉魚無着處。風兼雨玉龍生甲歸天去。

木客

詩 學圃憲蘇徐鉉帖鄱陽山中有木客秦時造阿房宮者食木實得不死時下山就民間取酒為詩云云

酒盡君莫沾。壺傾我當發。城市多囂塵。還山弄明月。

無名氏

詩

江上橋竿一百尺。山中樓臺十二重。山僧樓上望江上。指點橋竿笑殺儂。仙人未必便仙去。還在人間人不知。手把白鬚從兩鹿。相逢卻問姓名誰。

後主煜鬼

亡後見形詩

詩話總龜賈魏公京尹日忽有人來展刺謁曰前江南國主李煜相見則一清瘦道士耳公曰太師已物故何得及此曰某幼探釋氏未達誤有所見今為獅子國王偶思鍾山而來懷中取一詩授公公云云公讀之隨

手灰滅

異國非所志。煩勞殊清閑。驚濤千萬里。無乃見鍾山。

鍾輻妻

怨詩

江南野錄鍾輻金陵才生氣豪體傲一老僧相之曰先輩壽則有矣若及第則家亡記之輻大諄曰吾方掇高第以起家何亡之有時樊若水女才質雙盛愛輻之才妻之始燕爾科詔遂下時後周都洛輻入洛應書果中選甲科第二得

意不還。攜一女僕曰青箱。過華州之蒲城。其宰故人亦醞藉土。淹留久之。一夕追涼縣樓。痛飲而臥。青箱侍之。是夕夢其妻出。一詩爲示云云。怨頗深。輻夢中懷愧。亦答一詩曰。還吳東下過蒲城。樓上清風酒半醒。想得到家春欲暮。海棠千樹欲凋零。既寤頗厭之。因理歸裝。將至采石。青箱暴卒。輻悼歎無奈。匆匆藟葬於一新墳之側。急圖到家。則門巷空闕。妻已亡數月。其亡日。乃夢於縣樓之夕也。後數日。親友具舟攜輻致奠於葬所。卽青箱藟葬之側。新墳乃是。惟海棠數樹。方葉凋。夢謝正合詩中之句。因拊膺長慟曰。信乎浮屠師及第家亡之告。因不仕。隱鍾山。著書守道。壽八十餘。潘佑集有樊氏墓誌。與此稍同。

楚水平如練。雙雙白鳥飛。金陵幾多地。一去不言歸。

耿玉真

詩 南唐書。盧絳病瘧。夢白衣麗人贈詩一首云云。又歌菩薩蠻詞以勸酒曰。玉京人去秋蕭索。畫簷鵲起梧桐落。敬倚悄無言。月和清夢圓。背燈唯暗泣。甚處砧聲急。眉黛小山攢。芭蕉生暮寒。歌罷教以食蔗卽愈。果差。又夢曰。妾乃玉真也。他日富貴。相見於孟家坡。後入宋臨刑。有白衣婦人同斬。宛如所夢。問其姓名。曰耿玉真。其地則孟家坡也。古
今詩話。眉黛遠山攢。芭蕉生暮寒。此詞人能道之。而楊文公云。獨自凭闌干。衣襟生暮寒。未知孰是。

清風明月夜深時。箕帚盧郎恨已遲。他日孟家坡上約。再來相見是佳期。

田達誠借宅鬼

詩 稽神錄。廬陵有賈人田達誠。富于財物。頗以周給爲務。治第新成。有夜叩門者。就視無人。如是再三。因呵問之。爲人耶。鬼耶。良久答曰。實非人也。比居龍泉。舍爲暴水所漂。求寄君家。治舍畢。乃去耳。達誠不許曰。人豈可與鬼同居耶。對曰。暫寄居耳。無害于君。且以君義氣聞於鄉里。故告耳。達誠許之。因曰。當止我何所。達誠曰。惟有廳事耳。辭謝而去。數日復來曰。吾家已至廳中。亦無妨君賓客。然亦嚴整。家中人慎火。萬一不虞。或當云吾等所爲也。達誠亦虛其廳以付之。達誠嘗爲詩。鬼忽空中言。

曰君乃能詩耶。吾亦嘗好之。可嗜和耳。達誠卽具酒置紙筆於前。談論無所不至。衆目視之。酒與紙筆。儼然不動。試暫迴顧。則酒已盡。字已著紙矣。前後數十篇。皆有意趣。筆迹勁健。作柳體。或問其姓字。曰。吾倘言之。將不益於主人。可詩以寄言也。乃賦詩云云。衆皆不喻。一日復告曰。吾有少子。婚樟樹神女。以某日成禮。復欲借君後堂三日。以終君大惠。可乎。達誠亦虛其堂。以幕帷之。三日復謝曰。吾事訖矣。還君此堂。主人之恩。可謂至矣。然君家老婢某。可筭一百也。達誠辭謝。卽召婢筭數。下鬼曰。使之知過可止矣。達誠徐問其婢云。曾穴幕竊視。見賓客男女。廚膳花燭。與人間不殊。後歲餘。乃辭謝而去。達誠以事至廣陵。久之不歸。其家憂之。鬼復至曰。君家憂主人耶。吾將省之。翌日乃還曰。主正在揚州。甚無恙。行當歸矣。新納一妾與同寢。吾燒其帳後幅以戲之耳。大笑而去。達誠歸。問其事皆同。後至龍泉訪其居。亦竟不獲。

天然與我亦靈通。還與人間事不同。要識吾家真姓氏。大字南頭一段紅。

天祐中江南童謠。

五代史補。李昇本爲徐溫所養。爲左僕射。知政事。代徐知。以徐溫卒。江南遂爲昇有。先是童謠云。東海鯉魚飛上天。東海卽徐之望也。李者鯉也。蓋言昇自溫家起而爲君耳。又十國春秋。武義元年。又有童

謠云云。知誥本姓李。後應此謠。

江北楊花作雪飛。江南李樹玉團枝。李花結子可憐在。不似楊花無了期。

真人謠

全唐詩。唐末民間有此謠。元宗因。其子爲宏。冀以應之。

有一真人在冀川。開口持弓向外邊。子子孫孫萬萬年。

後主時童謠

南唐近事。解此謠云。娘謂後主。再聚周后。豬狗死。謂祚盡也。亥年。赤緞自病。貓有目病。則不能捕鼠。謂不見丙子之年也。

索得娘來忘卻家。後園桃李不生花。豬兒狗兒都死盡。養得貓兒患赤痕。

昇元殿基下石記

全唐詩話。其後李煜降於宋。好事者云。煜以丁酉年生。辛酉年襲位。即雞也。開寶八年甲戌。江南國滅。是跨犬也。時曹彬為大將。列柵城南。潘美為副將。城陷。恐有伏兵。命卒縱火。子建彬也。安仁美也。東鄰

謂錢俶。俶以戊寅年入朝。盡獻浙西土地人民。故末二句云云。末二句一作東鄰家道闕。隨虎遇明興。識者云。家道開無錢。

莫問江南事。江南事可憑。抱雞升寶位。跨犬出金陵。子建司南位。安仁秉夜燈。東鄰嬌小女。騎虎渡河冰。

江州風墜詩

全唐詩話。南唐胡則守江州。宋師攻之。堅壁不下。忽有旋風吹片紙墜城中云云。後城陷。果屠戮殆盡。先是有錢處士不知何許人。天祐末。嘗遊江淮。言李氏之祚云。髮鬚之間一倍楊。楊氏自稱尊至禪代二十年。李

氏三十九年果應。

由來秉節世無雙。獨守孤城死不降。何似知機早回首。免教流血滿長江。

廣陵古冢石刻

全唐詩。南唐保大中。廣陵理城隍。因及古冢得此。

日為箭兮月為弓。四時躬人兮無窮。但得天將明月死。不覺人隨流水空。山川秀兮碧穹窿。崇夫人墓兮直其中。猿啼鳥嘯烟濛濛。千年萬年松柏風。

硯滴銘

研比雜志。李仲芳家有南唐金銅蟾蜍硯滴。車厚奇古。腹下有篆銘云云。

捨月窟。

左足心

伏棐几。

右足心

爲我用。

左後足

貯清泚。

右後足

端溪石、澄心紙。

額下左右各三字

陳元氏、毛錐子。

腹兩旁各三字

同列

無譁聽驅使。微吾潤澤烏用汝。

腹下兩旁各七字

夢中語

南唐曾崇範其妻先許聘數人皆死後夢人得語云此是汝夫果嫁於曾也

田頭有鹿跡。田尾著日炙。

證空徒贊

證空臨川郭氏五代時人俗名居遁年十四入嵩嶽削髮爲僧謁洞仙价遂悟道嘗自寫半身影其徒贊之云云

日出連山。月圓當戶。不是無身。不欲全露。

江西通志

全五代詩卷四十

前蜀

前主王建

建字光圖。許州舞陽人。少爲忠武軍卒。稍遷隊將。楊復光討黃巢。建爲都頭。僖宗使將神策軍宿衛。文德元年。爲招討牙內都指揮使。大順二年。檢校司徒。成都尹。節度劍南西川招撫。雲南八國等使。天復三年。封蜀王。梁既篡唐。僭卽帝位。卒號高祖。

歐陽史。建少無賴。以屠牛盜驪販私鹽爲事。里人謂之賊王八。全唐詩話。建妻弟眉州

刺史周德權。值梁祖篡唐。引職文上表勸進云。李祐西王。逢吉昌德。兌興丹莫當。解曰。李祐西王。言唐後王氏興西方也。西方爲兌。丹朱也。言朱梁不敢抗也。建大悅。遂卽位。擢德權中書令。

贈別唐太師道襲

卯歲便將爲肘腋。二紀何曾離一日。更深猶向立案前。敷奏柔和不傷物。今朝榮貴慰我心。雙旌引向重城出。褒斜舊地委勳賢。從此生靈永泰息。

後主衍

衍字化源。建之子。爲後唐所滅。有烟花集。

十國春秋。咸康元年九月。奉太后太妃禱青城山。宮人皆衣雲霞之衣。自製甘州曲。令宮人唱之。其詞哀怨。聞者慘悽。詞曰。畫羅裙。能結

束稱腰身。柳眉桃臉。不勝春。薄媚足精神。可惜許。淪落在風塵。意本謂神仙在凡塵耳。及降中原。宮妓多淪落人間。蜀檮杌云。嘉王宗壽每諫諍。衍不樂。燕會。衍命工人李玉簫歌其所撰宮詞。送宗壽酒。宗壽懼禍。乃飲。佞臣潘在迎曰。嘉王聞玉簫卽飲。請以玉簫賜之。衍曰。王必不納。其詞云云。北夢瑣言。嬖佞韓昭。顧珣。潘迎等爲狎客。競又手搖頭。唐師入境。遏其報而遊幸。師至利州。方知將士紛然曰。且打叉手搖頭。念宣歌曰。不知身命促。把燭夜行遊。令宮女連臂。又蜀王衍俘繫入秦。至劍閣。見山川之美。賦詩云。不緣朝闕去。來此結茆廬。時人笑之。至咸陽。又作曲子云。盡是一場贏得。與夫無愁入井者。所較無多也。五代史。蜀人富而喜邀。當王氏晚年。競爲小帽。僅覆其頂。謂之危腦帽。又好裹尖巾。其狀如錐。而後宮皆戴金蓮花冠。衣道士服。酒酣免冠。其髻髮然更施朱粉。號醉粧。

醉粧詞

者邊走、那邊走、只是尋花柳。那邊走、者邊走、莫壓金杯酒。

幸秦川上梓潼山

喬巖簇冷烟。幽徑上寒天。下瞰峨眉嶺。上窺華岳巔。驅馳非取樂。按幸爲憂邊。此去如登陟。歌樓路幾千。

題劍門

緩轡踰雙劍。行行躡石稜。作千尋壁壘。爲萬祀依憑。道德雖無取。江山粗可矜。回看城闕路。雲疊樹層層。

過白衛嶺和韓昭儉

先期神武力開邊。畫斷封疆四五千。前望隴山屯劍戟。後憑巫峽鎖烽烟。軒皇尙自親平寇。嬴政徒勞愛學仙。想到隗宮尋勝處。正應鶯語暮春天。

宮詞

輝輝赫赫浮玉雲。宣華池上月華新。月華如水浸宮殿。有酒不醉真癡人。

張格

格字義師。河間人。唐宰相濬之子。仕蜀為翰林學士。拜中書侍郎同平章事。累加右僕射太傅。十國春秋。梁王全忠將謀篡代。密諷張全義圖濬。乃令楊麟率健卒圍其墅殺之。永寧縣葉彥者。張氏待之素厚。當麟來。彥偵知之。奔告格曰。相公之禍不可免。郎君宜自為計。格與濬父子持泣。濬謂之曰。留則併命。去則遺種。汝勿以吾為累。格拜辭以行。彥乃統義士三十人送渡漢江而旋。格由荊州上峽入成都。是時唐亂。人士多依兩川以避難。高祖雖起戎伍。為人饒智略。善待士。故所用皆唐名臣族。而待格恩禮尤異。

寄禪月大師

龍華咫尺斷來音。日夕空馳詠德心。禪月字清師。號別壽春。詩古帝恩深。畫成羅漢驚三界。書似張顛直萬金。莫倚名高忘故舊。曉晴閑步一相尋。

周庠

庠唐龍州司倉。後事王建。累官御史中丞。中書侍郎同平章事。王衍嗣位。進司徒。

十國春秋。庠子仁矩。官駙馬都

尉。粗有才藻。而庸劣特甚。國亡後。與貧丐者伍。令一人先道爵里於市肆間。有哀之者。日獲錢數百。相與飲噉為樂。成都人皆嗟歎之。

寄禪月大師

昨日塵遊到幾家。就中偏省近宣麻。水田鋪座時移畫。金地譚空說盡沙。傍竹欲添犀浦石。栽松更碾味江茶。有時捻得休公卷。倚柱閑吟見落霞。

王 鐸

鐸字鱣祥。仕蜀為翰林學士。遷御史中丞。歷中書侍郎同平章事。

十國春秋。唐師入成都。李昊草降表。上軍聞而降。書則鐸實為之。鐸至洛

陽。唐授以刺史。鐸上表。乞後主骸骨歸葬蜀山。有云。生為萬乘之君。死在匹夫之手。不允。人頗稱之。鐸家藏異書數千本。多手自丹黃。又親寫釋藏經若干卷。每趨朝。於白藤擔子內鈔書。書法絕工。其好學亦有足取者。

贈禪月大師

長愛吾師性自然。天心白月水中蓮。神通力遍恆沙外。詩句名高八米前。尋訪不聞朝振錫。修行惟說夜安禪。太平時節俱無事。莫惜時來話草元。

庾傳素

傳素事王建為蜀州刺史。累官至左僕射同平章事。罷為工部尚書。衍嗣立。加太子太保兼中

書侍郎。後降唐為刺史卒。

十國春秋。傳素領蜀州時。有唐興縣郎吏楊會者。事傳素甚謹。及傳素為相。除長馬以酬之。會堅辭曰。會之吏役。遠近皆知。忝冒為官。寧掩人口。且捨數千家供待。而博一虛名。長

馬無益也。時

人稱其有識。

木蘭花

木蘭紅豔多情態。不似凡花人不愛。移來孔雀檻邊栽。折向鳳凰釵上戴。是何芍藥爭風彩。自共牡丹長作對。若教爲女嫁東風。除卻黃鶯難匹配。

馮涓

涓字信之。東陽人。舉進士。登大中四年宏詞科。爲京兆府參軍。尋隱商山。昭宗起爲祠部郎中。擢眉州刺史。田陳拒命。不令之任。涓於成都墨池灌園自給。王建據蜀。以爲翰林學士。終御史大夫。所著有南冠龍吟、長樂等集十三卷。

北夢瑣言。馮涓分符眉州。不得之任。踟躕陳田之間。羈愁六年。著懷秦賦。有南冠梁川歌詩。皆自傷踴躍也。有蜀馱引云云。又題支機石云。不隨俗物皆成土。只待良時卻補天。苦雨行云。釜魚化作池中物。禾履口爲天際船。蜀城析骸之際。幾至殍殍。因投糶米家活。有詩云。取水郎中何日了。破柴員外幾時休。早知蜀地區媿與。悔不長安大比邱。通鑑綱目。涓爲建草殺陳敬瑄。田令孜表云。開押出虎。孔宣父不責他人。當路斬蛇。孫叔敖蓋非利己云云。天下快之。十國春秋。涓撰檄龍文大蟲榜。嶮竿歌。皆有文采。涓性滑稽。語多譏諷。高祖常問擊輪之戲。邛人何人。涓對曰。邛人所製。高祖爲大笑。又與司空王鐸等小酌。鐸舉令一字三呼。兩物相似曰。樂樂樂。冷淘似餚飴。涓曰。已已已。驢糞似馬矢。坐中大噱。涓但長嘯而已。又云。大中四年進士馮涓登第。榜中文譽最高。是歲暹羅國起樓。厚齎金帛。奏請撰記。時人榮之。

蜀馱引

昂藏大步蠶叢國。曲頸微伸高九尺。卓女窺窗莫我知。嚴仙據案何曾識。自古皆傳蜀道難。爾何能過拔蛇山。忽驚登得雞翁磧。又恐礙著鹿頭關。

楊玢

玢字靖夫。虞卿之曾孫也。蜀王建時。累官禮部尚書。衍嗣位。謫榮經尉。乾德中。復為太常少卿。

後歸後唐。授工部尚書。

談苑。玢自蜀歸唐。長安舊居多。為鄰里侵占。子弟欲詣府訴其事。以狀白玢。玢批紙尾云。四鄰侵我。我從伊。畢竟須思。未有時。試上含元殿。基望秋風。秋草正離離。子弟不復敢言。又登

慈恩寺塔云。紫雲樓下曲江平。鴉噪殘陽麥隴青。莫上慈恩最高望。不堪看。又不堪聽。

遺歌伎

垂老無端用意乖。誰知道侶厭清齋。如今又采蘼蕪去。辜負張君繡鞞鞋。

韓昭

昭字德華。長安人。為蜀後主王衍狎客。累官禮部尚書。文思殿大學士。唐兵入蜀。王宗弼梟斬

送唐。十國春秋。昭性便佞。善窺迎人意。與潘炕子在迎。顧彥朗子在珣。同為後主狎客。後主起宣華苑。昭與諸近臣。日夜侍後主。酣飲其中。男女雜坐。褻慢無所不至。或為豔歌唱和。沈涵無虛日。又昭粗有文章。至於琴棋書算射法。悉皆

涉獵。有朝士李台瑕譏之曰。韓八座事藝如拆。襪線無有寸長。時人譏之。海錄碎事載李台瑕云。韓昭凡事如僧剃髮。無有寸長。

和題劍門

閉關防老寇。孰敢振威稜。險固疑天設。山河自古憑。三川奚所賴。雙劍最堪矜。鳥道微通處。烟霞鎖百層。

從幸秦川過白衛獻詩

吾王巡狩為安邊。此去秦亭尚數千。夜照路歧山店火。曉通消息戍瓶烟。為雲巫峽雖神女。跨鳳秦樓是

謫仙八駿似龍人似虎。何愁飛過大漫天。

李浩弼

浩弼蜀翰林學士。

從幸秦川賦鷲獸歌

巖下年年自寢訛。生靈餐盡意如何。爪牙衆後民隨滅。溪壑深來骨已多。天子紀綱猶被弄。庸人窮獨固難過。長途莫怪無人跡。盡被山王稜郅他。

盧延讓

延讓字子善。范陽人。唐光化九年進士第。朗陵雷滿辟從事。滿敗歸。王建開國。授水部員外郎。累遷給事中。終刑部侍郎。卒。

撫言。先是延讓師薛許下。能爲詩。詞意入僻。時人多笑之。吳翰林融爲侍御史。出官峽中。延讓時薄遊荆渚。贊無卷軸。未遑贊謁。會融表弟滕籍者。偶得延讓百篇。融覽

大奇之曰。此無他。貴不尋常耳。于是稱之于府主成汭。時故相張公職大租。於是邦常以延讓爲笑端。及融言之。咸所改觀。延讓深所感激。然猶因循。竟未相面。後值融赴急。徵入內庭。孜孜于公卿間。稱譽不已。光化戊午歲。來自湘南。融一見如舊相識。延讓嗚咽流涕。于是攘臂成之矣。又盧延讓業僻澁詩。吳翰林雖以賦卷擢第。然八面受敵。深知延讓之能。延讓始投贊卷中。有說詩一篇。斷句云。因知文賦易。爲下得之乎。子華笑曰。上門惡罵來。詩史蜀盧延讓獻王建詩。卷中有栗爆燒。麤破。貓跳觸鼎翻之句。後建與潘峭。在內殿平章邊事。令宮人于爐中爆栗。栗爆出。燒損繡褥子。建多疑。每燒金鼎子。唯徐妃二妹妹侍茶湯而已。是夜貓誤觸鼎翻。建曰。憶延讓詩有一聯云云。先輩裁詩信無虛境。遂有六行之拜。詩話總龜作盧

延遜上太宗詩。潘峭作潘美。延遜當卽延讓。宋諱讓字故也。盧延讓詩目爲容易。如每過私第邀看鶴。長著公裳送上驢。高僧解語牙無水。老鶴能飛骨有風。其殆庶幾。又如栗爆貓跳云云。而楊文公愛之。不知何謂。談苑延遜詩淺近人皆笑之。惟吳融獨重之。且云後必垂名。延遜詩亦有佳處。宿東林云。兩三條電欲爲雨。七八個星猶在天。旅舍言懷云。名紙毛生五門下。家童骨立六街中。蜀路云。雲間聞鐸驟。馱去雪裏殘骸虎。拽來寄人云。吟安一個字。撚斷數莖髭。又樹上謔譏批頰鳥。窗間腦膊叩頭虫。余在翰林常召對。上舉延遜詩云。臂鷹健卒懸氈帽。騎馬佳人卷畫衫。雖淺近亦自成一體。全唐詩話。延讓有哭亡將詩云。自是礪砂發。非千駭石傷。牒高身上職。盃大背邊瘡。亦善謔也。北夢瑣言。延讓有詩云。不同文賦異。爲是者之乎。復入翰林。閣筆而已。同列戲之曰。不同文賦易。爲是者之乎。竟以不稱職。數日而罷。十國春秋。延讓所業詩。有狗觸店門開。鱧貓臨鼠穴。嚙犬舐魚砧。諸句甚爲張潛成汭所賞。及高祖時。復以詩語巧合擢用。延讓謂人曰。平生投謁公卿。不意得力于貓兒狗子。聞者大噱。紀事。延讓入蜀。頗爲蜀人所易。有句云。莫欺零落殘牙齒。曾吃紅綾餅餤來。延讓放進士第二人。曾燕於曲江。勅大官十八人。賜餅餤。蓋唐御食。以紅綾餅餤爲上品也。郭熙畫意。延讓雪詩云。渡水蹇驢雙耳直。避風羸僕一肩高。海錄碎事。延讓有帛孟浩然句云。高據襄陽播盛名。問人人道是詩星。錦繡萬花谷。延讓有句云。涼雨打低殘菡萏。急風吹散小蜻蜓。

苦吟

莫話詩中事。詩中難更無。吟安一箇字。撚斷數莖鬚。險覓天應悶。狂搜海亦枯。不同文賦易。爲著者之乎。

雪

瑞雪落紛華。隨風一向斜。地平鋪作月。天迴撒成花。客滿燒烟舍。牛牽賣炭車。吾皇憂挾纊。猶自問君家。

冬除夜書情

兀兀坐無味。思量誰與隣。數星深夜火。一個遠鄉人。雁翥天微雪。風號樹欲春。愁章自難過。不覺苦吟頻。

觀新歲朝賀

龍墀初立仗。鴛鷺列班行。元日燕脂色。朝天樺燭香。表章堆玉案。繒帛滿牙牀。三百年如此。無因及我唐。

八月十六日夜月

十六勝三五。中天照大荒。祇訛夢子緣。應耗沒多光。桂老猶全在。蟾深未煞忙。難期一年事。到曉泥詩章。

松寺

山寺取涼當夏夜。共僧蹲坐石堦前。兩三條電欲爲雨。七八箇星猶在天。衣汗稍停床上扇。茶香時撥澗中泉。通宵聽論蓮華義。不藉松窗一覺眠。

贈僧

浮世浮華一斷空。偶拋煩惱到蓮宮。高僧解語牙無水。老鶴能飛骨有風。野色吟餘生竹外。山陰坐久入池中。禪師莫問求名苦。滋味過於食蓼蟲。

逢友人赴闕

正當天下待雍熙。丹詔徵來早爲遲。倚馬才高猶愛藝。問牛心在肯容私。吏開黃閣排班處。民擁青門看入時。卻笑郡人留不得。感恩唯擬立生祠。

哭李郢端公

軍門半掩槐花宅。每過猶聞哭臨聲。北固暴亡兼在路。東都權葬未歸塋。漸窮老僕慵看馬。著慘佳人暗

理箏詩侶酒徒消散盡。一場春夢越王城。

謝楊尙書惠櫻桃

滿合虛紅怕動搖。尙書知重賜櫻桃。揉藍尙帶新鮮葉。潑血猶殘舊折條。萬顆真珠輕觸破。一團甘露軟含消。春來老病尤珍荷。併食中腸似火燒。

寒食日戲贈李侍御

十二街如市。紅塵咽不開。灑蹄驄馬汗。沒處看花來。

樊川寒食二首

寒食權豪盡出行。一川如畫雨初晴。誰家絡絡游春盛。擔入花間軋軋聲。鞍馬和花總是塵。歌聲處處有佳人。五陵年少羸於事。栲栳量金買斷春。

張道古

道古一名睨。字子美。臨淄人。景福中擢進士第。官右拾遺。以直諫謫施州司戶。後入蜀。王建召爲武司郎中。尋復貶死。

十國春秋道古爲右拾遺播遷之後上疏言五危二亂七事謫官去後賣卜青城市中章莊薦爲節度使官又上高祖詩序五危二亂事爲同僚所疾安置茂州鄭雲叟在華州聞其卒

作詩弔之詩話貫休悼張道古詩云清河逝水大恩恩東觀無人失至公天上君恩三載隔

鑑中鸞影一時空墳生苦霧蒼茫外門掩寒雲寂寞中惆悵斯人又如此一聲蠻笛滿江風

上蜀王

封章才達冕旒前。黜詔俄離玉座端。二亂豈由明主用。五危終被佞臣彈。西巡鳳府非爲固。東播鑿與卒未安。諫疏至今如可在。誰能更與讀來看。

牛嶠

嶠字松卿。隴西人。乾符五年進士。官尚書郎。王建僭位。爲給事中。有集三十三卷。

十國春秋。嶠自言竊慕李賀長

歌。舉筆輒效之。尤善製小詞。女冠子云。繡帶芙蓉帳。金釵芍藥花。又山月照山花。夢回燈影斜。皆嶠佳句也。陸游云。嶠定西番爲塞下曲。望江怨爲閨中曲。是盛唐遺音。及讀翠娥愁。不擡頭。則又刻細似晚唐。姜白石云。嶠有楊柳枝詞。見稱於時。

春曉曲

春入橫塘搖淺浪。花落小園空惆悵。此情誰信爲狂夫。恨翠愁紅流枕上。小玉窗前噴燕語。血淚滴穿金線縷。雁歸不見報郎歸。織成錦字封過與。

紅薔薇

曉啼珠露渾無力。繡簇羅襦不着行。若綴壽陽公主額。六宮爭肯學梅粧。

楊柳枝

解凍風來末上青。解垂羅袖拜卿卿。無端裊娜臨官路。舞送行人過一生。

吳王宮裏色偏深。一簇纖條萬縷金。不憤錢塘蘇小小。引郎松下結同心。
橋北橋南千萬條。恨伊張緒不相饒。金羈白馬臨風望。認得羊家靜婉腰。
狂雪隨風撲馬飛。惹烟無力被春欺。莫教移入靈和殿。宮女三千又妬伊。
裏翠籠烟拂暖波。舞裙新染麴塵羅。章華臺畔隨堤上。傍得春風爾許多。

丹鉛總錄云。因詠柳而貶松。所謂尊題格也。有改松下作枝下者誤。

牛希濟

希濟嶠之兄子。隴西人。仕蜀。王衍時為起居郎。累官翰林學士。御史中丞。後入後唐。為雍州節

度副使。

碧溪詩話。鑿戒錄。天成初。明宗召亡蜀舊臣賦詩。惟中丞牛希濟最佳。明宗曰。希濟不忘君親。忠孝也。賜物百段。十國春秋。希濟素以詩辭擅名。所撰臨江仙二闕。有云。月斜江上。征棹動晨鐘。又云。皆道勝人間。須知狂客拚

死為紅顏。特為詞家之雋。又次牛嶠女冠子四闕。時輩嘖嘖稱道。女冠子。故唐駱賓王代王靈妃贈李榮長篇。因取以為名。

閨怨

春山烟欲收。天澹星稀小。殘月臉邊明。別淚臨清曉。語多情未了。回首猶重道。記得綠羅裙。處處憐芳草。

奉詔賦蜀主降唐

得川字

滿城文武欲朝天。不覺隣師犯塞烟。唐主再懸新日月。蜀王難保舊山川。非干將相扶持拙。自是君臣數盡年。古往今來亦如此。幾曾歡笑幾潸然。

全五代詩卷四十一

前蜀

韋莊

莊字端己。杜陵人。見素之後。乾寧元年第進士。授校書郎。轉補闕。與李洵爲兩川宣諭和協使。莊以中原多故。潛欲依蜀。前主建辟爲掌書記。尋擢起居舍人。累官至門下侍郎。吏部尙書。同平章事。卒。諡文靖。所著有浣花集。又元集。

五代史。端己以豔語見長。應舉時。遇黃巢犯闕。著秦婦吟云。內庫燒爲錦繡灰。天街蹋盡公卿骨。人稱爲秦婦吟秀才。鑑誠錄。詩之作

也。窮達之分可見。莊感懷七律詩末句云。大道不將爐冶去。有心重立太平基。其詩甚壯。故至台輔。北夢鎖言。杜荀鶴嘗吟一聯云。舊衣灰絮絮。新酒竹籬籬。或話於莊。莊擬之曰。印將金鎖鎖。簾用玉鉤鉤。卽大拜之祥也。胡孝轅癸籤。韋莊詩。靜極卻嫌流水鬧。閑多翻笑野雲忙。本於老杜之水流心不競。雲在意俱遲。但多着一嫌字笑字。覺非真閑真靜耳。又莊卒之歲。日誦杜甫白沙翠竹江村暮。相送柴門月色新之句。吟諷不置。及卒。葬白沙之陽。十國春秋。莊有美姬。善文翰。高祖託以教宮人爲辭。強奪去。莊作謁金門詞憶之云。空相憶。無計得傳消息。天上嫦娥人不識。寄書何處覓。新睡覺來無力。不忍把君書迹。滿院落花春寂寂。斷腸芳草碧。姬聞之。不食而死。又莊常取唐人麗句勒成。又元集。其自序云。謝元暉文集盈編。止誦澄江之句。曹子建詩名冠古。惟吟清夜之篇。是知美稼千箱。兩岐奚少。繁弦九變。大獲此稀。入華林而珠樹非多。閱象籟而紫簫惟一。所以擷芳林下。拾翠巖邊。沙之汰之。始辨辟寒之寶。載雕載琢。方成瑚璉之珍。故知領下探珠。難求

十斛管中窺豹。但取一斑。思食馬留肝。徒云染指。豈烹魚去乙。或至傷鱗。自慙乎鼯鼠易盈。非嗜其熊蹯獨美。然則律者既探繁者是除。何知黑白之鵝。強識淄澠之水。莊文詞甚多。不具錄。戊籤莊浣花集。弟藹編錄序略云。家兄自庚子亂離前。凡著歌詩文章數十通。屬兵火迭興。簡編俱墜。惟餘口誦者。所存者幾耳。後流離湮泛。寓目緣情。迄於癸亥歲。又綴僅千餘首。辛酉春應聘爲蜀奏記。明年浣花溪尋得杜工部舊址。結茅爲室。思其人。欲成其處。藹因錄兄稿。或默誦者。次爲十卷。目之曰浣花集。亦杜陵所居之義也。後所製用繼于右。時癸亥六月九日。一按偽史莊全集二十卷。晁公武讀書志稱。僅存五卷。今行世十卷。入蜀後詩槩無之。亦非全本也。集以年爲次。今編分體。仍注其年于下。集所不載者。搜得七十首。注補遺二

字附各體末

平陵老將

日羽金僕姑。腰懸雙轆轤。前年蔥嶺北。獨戰雲中胡。疋馬塞垣老。一身如鳥孤。歸來辭第宅。卻占平陵居。少年行

五陵豪客多。買酒黃金鱗。醉下酒家樓。美人雙翠幘。揮劍邯鄲市。走馬梁王苑。樂事殊未央。年華已云晚。

閨月

明月照前除。煙華蕙蘭溼。清風行處來。白露寒蟬急。美人情易傷。暗上紅樓立。欲言無處言。但向姮娥泣。

閨怨

戚戚彼何人。明眸利於月。啼妝曉不乾。素面凝香雪。良人去淄右。鏡破金簪折。空藏蘭蕙心。不忍琴中說。

上春詞

曠曠赫日東方來。禁城煙煖蒸青苔。金樓美人花屏開。晨妝未罷車聲催。幽蘭報暖紫芽折。天花愁豔蝶飛迴。五陵年少惜花落。酒濃歌極翻如哀。四時輪環終又始。百年不見南山摧。遊人陌上騎生塵。顏子門前吹死灰。

擣練篇

月華吐豔明燭燭。青樓婦唱擣衣曲。白袷絲光織魚目。菱花綬帶鴛鴦簇。臨風縹緲疊秋雪。月下丁冬擣寒玉。樓蘭欲寄在何鄉。憑人與繫征鴻足。

雜體聯錦

攜手重攜手。夾江金線柳。江上柳能長。行人戀尊酒。尊酒意何深。爲郎歌玉簪。玉簪聲斷續。鈿軸鳴雙轂。雙轂去何方。隔江春樹綠。樹綠酒旗高。淚痕沾繡袍。袍縫紫鵝溼。重持金錯刀。錯刀何燦爛。使我腸千斷。腸斷欲何言。簾動真珠繁。真珠綴秋露。秋露沾金盤。金盤湛瓊液。仙子無歸跡。無跡又無言。海煙空寂寂。寂寂古城道。馬嘶芳岸草。岸草接長堤。長堤人解攜。解攜忽已久。緬邈空回首。回首隔天河。恨唱蓮塘歌。蓮塘在何許。日暮西山雨。

長安春

長安二月多香塵。六街車馬聲磷磷。家家樓上如花人。千枝萬枝紅豔新。簾間笑語自相問。何人占得長

安春。長安春色本無主。古來盡屬紅樓女。如今無奈杏園人。駿馬輕車擁將去。

撫盈歌

鳳穀兮鴛綃。霞疏兮綺寮。玉庭兮春晝。金屋兮秋宵。愁瞳兮月皎。笑頰兮花嬌。羅輕兮濃麝。室煖兮香椒。鑾輿去兮蕭屑。七絲斷兮沆寥。主父臥兮漳水。君王幸兮雲輶。鉛華窅窕兮穠姿。棠公臍蠶兮靡依。翠華長逝兮莫追。晏相望門兮空悲。

信州西三十里山名僊人城下有月巖山其狀秀拔中有山門如滿月之狀余因行役過其下聊賦是詩

驅車過閩越。路出饒陽西。僊山翠如畫。簇簇生虹蜺。羣峯若侍從。衆阜如嬰提。巖巒互吞吐。嶺岫相追攜。中有月輪滿。皎潔如圓珪。玉皇恣遊覽。到此神應迷。常娥曳霞帔。引我同攀躋。騰騰上天半。玉鏡懸飛梯。瑤池何悄悄。鸞鶴煙中棲。回頭望塵世。露下寒淒淒。

乞彩牋歌

浣花溪上如花客。綠閣紅藏人不識。留得溪頭瑟瑟波。潑成紙上猩猩色。手把金刀擘綵雲。有時翦破秋天碧。不使紅霓段段飛。一時驅上丹霞壁。蜀客才多染不供。卓文醉後開無力。孔雀銜來向日飛。翩翩壓折黃金翼。我有歌詩一千首。磨礪山岳羅星斗。開卷長疑雷電驚。揮毫只怕龍蛇走。班班布在時人口。滿袖松花都未有。人間無處買煙霞。須知得自神仙手。也知價重連城璧。一紙萬金猶不惜。薛濤昨夜夢中

來。殷勤勸向君邊覓。

贈峨嵋山彈琴李處士

峨嵋山下能琴客。似醉似狂人不測。何須見我眼偏青。未見我身頭已白。茫茫四海本無家。一片愁雲颺秋碧。壺中醉臥日月明。世上長遊天地窄。晉朝叔夜舊相知。蜀郡文君小來識。後生常建彼何人。贈我篇章苦雕刻。名卿名相盡知音。遇酒遇琴無間隔。如今世亂獨翛然。天外鴻飛招不得。余今正泣楊朱淚。八月邊城風刮地。霓旌絳旆忽相尋。爲我尊前橫綠綺。一彈猛雨隨手來。再彈白雲連天起。淒淒清清松上風。咽咽幽幽隴頭水。吟蜂遶樹去不來。別鶴引雛飛又止。錦鱗不動惟側頭。白馬仰聽空豎耳。廣陵故事無人知。古人不說今人疑。子期子野俱不見。烏啼鬼哭空傷悲。坐中詞客悄無語。簾外月華庭欲午。爲君吟作聽琴歌。爲我留名係仙譜。

南陽小將張彥。硤口鎮稅人場射虎歌

海內昔年狎太平。橫目穰穰何崢嶸。天生天殺豈天怒。忍使朝朝餵猛虎。關東驛路多邱荒。行人最忌稅人場。張彥雄特制殘暴。見之叱起如叱羊。鳴弦霹靂越幽阻。往往依林猶抗拒。草際旋看垂節茵。腰間不便抽白羽。老饕已斃衆雛恐。童稚擲揄皆自勇。忠良効順勢亦然。一劍猜狂敢輕動。有文有武方爲國。不是英雄伏不得。試徵張彥作將軍。幾箇將軍願策勳。

章臺夜思

清瑟怨遙夜。遶弦風雨哀。孤燈聞楚角。殘月下章臺。芳草已云暮。故人殊未來。鄉書不可寄。秋雁又南迴。

延興門外作

芳草五陵道。美人金犢車。綠奔穿內水。紅落過牆花。馬足倦遊客。鳥聲歡酒家。王孫歸去晚。宮樹欲棲鴉。

劉得仁基

至公遺至藝。終抱至冤沈。名有詩家業。身無戚里心。桂和秋露滴。松帶夜風吟。冥寞知春否。墳高日已深。

梁氏水齋

獨醉任騰騰。琴棋亦自能。卷簾山對客。開戶犬迎僧。看蟻移苔穴。聞蛙落石層。夜窗風雨急。竹外一菴燈。

曲池作

細雨曲池濱。青袍草色新。詠詩行信馬。載酒喜逢人。性爲無機率。家因守道貧。若無詩自遣。誰奈寂寥春。

嘉會里閑居

豈知城闕內。有地出紅塵。草占一方綠。樹藏千古春。馬嘶遊寺客。犬吠探花人。寂寂無鐘鼓。槐行接紫宸。

夏夜

傍水遷書榻。開襟納夜涼。星繁愁晝熱。露重覺荷香。蛙吹鳴還息。蛛羅滅又光。正吟秋興賦。桐影下西牆。

早發

早霧濃於雨。田深黍稻低。出門雞未唱。過客馬頻嘶。樹色遙藏店。泉聲暗傍畦。獨吟三十里。城月尙如珪。

愁

避愁愁又至。愁至事難忘。夜坐心中火。朝爲鬢上霜。不經公子夢。偏入旅人腸。借問高軒客。何鄉是醉鄉。

村居書事

年年耕與釣。鷗鳥已相依。砌長蒼苔厚。藤抽紫蔓肥。風鶯移樹轉。雨燕入樓飛。不覺春光暮。遶籬紅杏稀。

雨霽晚眺

庚子年冬大
駕幸蜀後作

入谷路縈紆。巖巔日欲晡。嶺雲寒埽蓋。溪雪凍黏鬚。臥草跼如兔。聽冰怯似狐。仍聞關外火。昨夜徹皇都。

賊中與蕭韋二秀才同臥重疾二君尋愈余獨加焉恍忽之中因有題

與君同臥疾。獨我漸彌留。弟妹不知處。兵戈殊未休。胸中疑晉豎。耳下鬪殷牛。縱有秦醫在。懷鄉亦淚流。

重圍中逢蕭校書

相逢俱此地。此地是何鄉。側目不成語。撫心空自傷。劍高無鳥度。樹暗有兵藏。底事征西將。年年戍洛陽。

宿山家

山行侵夜到。雲竇一星燈。草動蛇尋穴。枝搖鼠上藤。背風開藥竈。向月展漁罾。明日前溪路。煙蘿更幾層。

和人歲宴旅舍見寄

積雪滿前除。寒光夜皎如。老憂新歲近。貧覺故交疎。意合論文後。心降得句初。莫言常鬱鬱。天道有盈虛。

對酒賦友人

多病仍多感，君心自我心。浮生都是夢，浩歎不如吟。白雪篇篇麗，清醑盞盞深。亂離俱老大，強醉莫霑襟。

潁陽縣

琴堂連少室，故事卽僊蹤。樹老風聲壯，山高臘候濃。雪多庭有鹿，縣僻寺無鐘。何處留詩客，茆簷倚後峯。

寄園林主人

主人常不在，春物爲誰開。桃豔紅將落，梨花雪又摧。曉鶯閑自嘯，遊客暮空回。尙有餘芳在，猶堪載酒來。

贈薛秀才

相辭因避世，相見尙兵戈。亂後故人少，別來新話多。但聞哀痛詔，未覩凱旋歌。欲結岩棲伴，何山好薜蘿。

和元秀才別業書事

僻居春事好，水曲亂花陰。浪過河移岸，雛成鳥別林。綠錢榆貫重，紅障杏籬深。莫飲宜城酒，愁多醉易沈。

紀村事

綠蔓映雙扉，循牆一徑微。雨多庭果爛，稻熟渚禽肥。釀酒迎新社，遙砧送暮暉。數聲牛上笛，何處餉田歸。

題旰僊師院

地古多喬木，遊人到且吟。院開金鎖澀，門映綠篁深。山色不離眼，鶴聲長在琴。往來誰與熟，乳鹿住前林。

不寐

不寐天將曉。心勞轉似灰。蚊吟頻到耳。鼠鬪競緣臺。戶闇知蟾落。林喧覺雨來。馬嘶朝客過。知是禁門開。
贈武處士

一身唯一室。高靜若僧家。掃地留疎影。穿池浸落霞。綠蘿臨水合。白道向村斜。賣藥歸來醉。吟詩倚釣查。
春暮

一春春事好。病酒起常遲。流水綠縈砌。落花紅墮枝。樓高喧乳燕。樹密鬪雛鷗。不學山公醉。將何自解頤。
哭麻處士

卻到歌吟地。閑門草色中。百年流水盡。萬事落花空。繡帳扃秋月。詩樓鏤夜蟲。少微何處墮。留恨白楊風。
和友人

閉門同隱士。不出動經時。靜閱王維畫。閑翻褚允棋。落泉當戶急。殘月下窗遲。卻想從來意。譙周亦自嗤。
春愁

寓思本多傷。逢春恨更長。露霑湘竹淚。花墮越梅妝。睡怯交加夢。閑傾瀲灩觴。後庭人不到。斜月上松篁。
晚春

花開疑乍富。花落似初貧。萬物不如酒。四時唯愛春。峨峨秦氏髻。皎皎洛川神。風月應相笑。年年醉病身。
送崔郎中往使西川行在

拜書辭玉帳。萬里劍關長。新馬杏花色。綠袍春草香。一身朝玉陛。幾日過銅梁。莫戀爐邊醉。僊宮待侍郎。

潤州顯濟閣曉望

清曉水如鏡。隔江人似鷗。遠煙藏海島。初日照揚州。地壯孫權氣。雲凝庾信愁。一篷何處客。吟凭釣魚舟。

過當塗縣

客過當塗縣。停車訪舊遊。謝公山有墅。李白酒無樓。采石花空發。烏江水自流。夕陽誰共感。寒鷺立汀洲。

鑷白

白髮太無情。朝朝鑷又生。始因絲一縷。漸至雪千莖。不避佳人笑。唯慙稚子驚。新年過半百。猶歎未休兵。

遣興

如幻如泡世。多愁多病身。亂來知酒聖。貧去覺錢神。異國清明節。空江寂寞春。聲聲林上鳥。喚我北歸秦。

建昌渡暝吟

月照臨官渡。鄉情獨浩然。烏棲彭蠡樹。月上建昌船。市散漁翁醉。樓深賈客眠。隔江何處笛。吹斷綠楊煙。

歲除對王秀才作

我惜今宵促。君愁玉漏頻。豈知新歲酒。猶作異鄉身。雪向寅前凍。花從子後春。到明追此會。俱是隔年人。

酒渴愛江清

酒渴何方療。江波一掬清。瀉甌如練色。漱齒作泉聲。味帶他山雪。光含白露精。只應千古後。長稱伯倫情。

南遊富陽江中作

南去又南去。此行非自期。一颿雲作伴。千里月相隨。浪跡花應笑。衰容鏡每知。鄉園不可問。禾黍正離離。

婺州水館重陽日作

異國逢佳節。憑高獨苦吟。一杯今日酒。萬里故鄉心。水館紅蘭合。山城紫菊深。白衣雖不至。鷗鳥自相尋。

避地越中作

避世移家遠。天涯歲已周。豈知今夜月。還是去年愁。露果珠沈水。風螢燭上樓。傷心潘騎省。華髮不禁秋。

信州溪岸夜吟作

夜倚臨溪店。懷鄉獨苦吟。月當山頂出。星倚水湄沈。霧氣漁燈冷。鐘聲谷寺深。一城人悄悄。琪樹宿僊禽。

齊安郡

彌棹齊安郡。孤城百戰殘。傍村林有虎。帶郭縣無官。暮角梅花怨。清江桂影寒。黍離緣底事。撩我起長歎。

寄江南諸弟

萬里逢歸雁。鄉書忍淚封。吾身不自保。爾道各何從。性拙唯多蹇。家貧半爲慵。祇思溪影上。臥看玉華峯。

雞公幘

去襄城縣二十里

石狀雖如幘。山形可類雞。向風疑欲鬪。帶雨似聞啼。蔓織青籠合。松長翠羽低。不鳴非有意。爲怕客奔齊。

靈席

一閉香閨後。羅衣盡施僧。鼠偷筵上果。蛾撲帳前燈。土蝕釵無鳳。塵生鏡少菱。有時還影響。花葉曳香縈。

舊居

芳草又芳草。故人楊子家。青雲容易散。白日等閑斜。皓質留殘雪。香魂逐斷霞。不知何處笛。一夜叫梅花。

歲晏同左生作

歲暮鄉關遠。天涯手重攜。雪埋江樹短。雲壓夜城低。寶瑟湘靈怨。清砧杜魄啼。不須臨皎鏡。年長易淒淒。

秋霽晚景

秋霽禁城晚。六街煙雨殘。牆頭山色健。林外鳥聲歡。翹日樓臺麗。清風劍佩寒。玉人襟袖薄。斜凭翠闌干。

覽蕭必先卷

滿軸編新句。翛然大雅風。名因五字得。命合一言通。景盡才難盡。吟終意未終。似逢曹與謝。煙雨思何窮。

寓言

爲儒逢世亂。吾道欲何之。學劍已應晚。歸山今又遲。故人三載別。明月兩鄉悲。惆悵滄江上。星星鬢有絲。

哭同舍崔員外

卻到同遊地。三年一電光。池塘春草在。風燭故人亡。祭罷泉聲急。齋餘磬韻長。碧天應有恨。斜日弔松篁。

婺州和陸諫議將赴闕懷陽羨山居

望闕路仍遠。子牟魂欲飛。道開燒藥鼎。僧寄臥雲衣。故國饒芳草。他山挂夕暉。東陽雖勝地。王粲奈思歸。

不出院楚公

自三衢至江西作

自禪關閉心猿日漸馴不知城郭路稀識市朝人履帶塔前雪衣無寺外塵卻嫌山翠好詩客往來頻

漁塘十六韻

在朱陽縣石岩下古老云洛山一派流出此山

洛水分餘脈穿巖出石稜碧經嵐氣重清帶露華澄瑩澈通三島巖梧積萬層巢由應共到劉阮想同登
壁峻苔如畫山昏霧似蒸撼松衣有雪題石硯生冰路熟雲中客名留域外僧飢猿尋落橡鬪鼠墮高藤
嶮樹臨溪亞殘莎帶岸崩持竿聊藉草待月好垂罾對景思任父開圖想不興晚風輕浪疊暮雨溼煙凝
似泛靈槎出如迎羽客昇仙源終不測勝概自相仍欲別誠堪戀長歸又未能他時操史筆爲爾著良稱

和薛先輩見寄初秋寓懷卽事之作二十韻

玉律初移候清風乍遠襟一聲禪到耳千炬火然心嶽靜雲堆翠樓高日半沈引愁憎暮角驚夢怯殘砧
露白凝霜簟風篁韻蜀琴鳥喧從果爛塔淨任苔侵柿葉添紅景槐柯減綠陰採珠逢寶窟閱石見瑤林
魯殿鏗寒玉苔山激碎金邳堂流桂景陳巷集車音名目張華顯詞因葛亮吟水深龍易失天遠鶴難尋
鑒貌寧慙樂論才豈謝任義心孤劍直學海怒濤深既覩文兼資翻疑古在今慙聞紆綠綬卽候挂朝簪
晚樹連秋塢斜陽映暮岑夜蟲方唧唧疲馬正駸駸託跡同吳燕依仁似越禽會隨仙羽化香蟻且同斟

初秋寓懷卽事同舊韻

大火收殘暑。清光漸惹襟。謝莊千里思。張翰五湖心。暮角迎風急。孤鐘向暝沈。露滋三徑草。日動四鄰砧。簾委班姬扇。蟬悲蔡琰琴。方愁丹桂遠。已怯二毛侵。甃石迴泉脈。移棋就竹陰。觸絲蛛墮網。避隼鳥投林。貌愧潘郎璧。文慙呂相金。但埋鄴獄氣。未發爨桐音。靜笑劉琨舞。閑思阮籍吟。野花和露鬪。怪石入雲尋。跡竟終非幻。幽閑且自任。趨時慙藝薄。託質仰恩深。美價方稀古。清名已絕今。旣聞留縞帶。詎肯擲蒼簪。遲客虛高閣。迎僧出亂岑。壯心徒戚戚。逸足自駸駸。安羨倉中鼠。危同幕上禽。期君調鼎鼎。他日俟羊斟。

三用韻

素律初迴馭。商飈暗觸襟。乍傷詩客思。還動旅人心。蟬噪因風斷。鱗遊見鷺沈。笛聲隨晚吹。松韻激遙砧。地覆青袍草。窗橫綠綺琴。煙霄難自致。歲月易明侵。澗柳橫孤釣。巖藤架密陰。瀟湘期釣侶。鄴杜別家林。遺愧虞卿壁。言依季布金。錚鏘聞郢唱。次第發巴音。螢影衝簾落。蟲聲擁砌吟。樓高思共釣。寺遠想同尋。入夜愁難遣。逢秋恨莫任。蝸遊苔徑滑。鶴步翠塘深。莫問榮兼辱。寧論古與今。固窮憐瓮牖。感舊惜蒿簪。晚日舒霞綺。遙天倚黛岑。鴛鸞方颺颺。驂驥整駸駸。未化投陂竹。空思出谷禽。感多聊自遣。桑落且閑斟。

李氏小池亭十二韻

時在婺州
寄居作

積石亂巉巖。庭莎綠不芟。小橋低跨水。危檻半依巖。花落魚爭啜。櫻紅鳥競鷗。引泉疏地脈。掃絮積山嵌。古柳紅綃織。新篁紫綺緘。養猿秋嘯月。放鶴夜棲杉。枕簟谿雲膩。池塘海雨鹹。語窗雞逞辨。砥鼎犬偏饑。

踏蘚青粘屐。攀蘿綠映衫。訪僧舟北渡。貫酒日西銜。遲客登高閣。題詩遶翠嵒。家藏何所寶。清韻滿琅函。

和李秀才郊墅早春吟興十韻

暖律變寒光。東君景漸長。我悲遊海嶠。君說住柴桑。雪色隨高嶽。冰聲陷古塘。草根微吐□。花朵半含霜。酒市多逋客。漁家足夜航。匡廬雲傍屋。彭蠡浪衝牀。綠擺楊枝嫩。紅桃菜甲香。鳳凰城已盡。鸚鵡賦應狂。佇見龍辭沼。寧憂雁失行。不應雙劍氣。長在斗牛傍。

和鄭拾遺秋日感事一百韻

禍亂天心厭。流離客思傷。有家拋上國。無罪謫遐方。負笈將辭越。揚颿欲泛湘。避時難駐足。感事易回腸。雅道何銷德。妖星忽耀芒。中原初縱燎。下國竟探湯。盜據三秦地。兵纏八水鄉。戰塵輕犯闕。羽旆遠巡梁。自此修文代。俄成講武場。熊羆驅涿鹿。犀象走昆陽。御馬迷新棧。宮娥改舊粧。五丁功再覩。八難事難忘。鳳引金根疾。兵環玉弩彊。建牙雖可恃。摩壘詎能防。霍廟神遐遠。圮橋路杳茫。出師威似虎。禦敵狠如羊。眉畫猶思赤。巾裁未厭黃。晨趨鳴鐵騎。夜舞挹瓊觴。僭侈形襜亂。誼呼繡鬢攘。但聞爭曳組。詎見學垂韁。鵠印提新篆。龍泉奪曉霜。軍威徒逗撓。我武自維揚。負辰勞天眷。凝旒念國章。繡旗張畫獸。寶馬躍紅鴛。但欲除妖氣。寧思蔽耿光。曉煙生帝里。夜火入春坊。鳥怪巢宮樹。狐驕上苑牆。設危終在德。視履豈無祥。氣激雷霆怒。神驅岳瀆忙。功高分虎節。位下恥龍驤。遍命登壇將。巡封異姓王。志求扶墜典。力未振頽綱。漢路閑鷗鷺。雲衢駐驪驄。寶裝軍器麗。蔚裊戰袍香。日覩兵書捷。時聞虜騎亡。人心驚獬豸。雀意伺螳螂。

上略咸推妙。前鋒詎可當。紆金光照耀。執玉意藏昂。覆餗非無謂。奢華事每詳。四民皆組綬。九土墮耕桑。飛騎黃金勒。香車翠鈿裝。八珍羅膳府。五采鬪匡牀。宴集喧華第。歌鐘簇畫梁。永期傳子姓。寧誤犯天狼。未覩君除側。徒思玉在傍。竄身奚可保。易地喜相將。國運方夷險。天心詎測量。九流雖暫蔽。三柄豈相妨。小孽乖躔次。中興繫昊蒼。法堯功已普。罪已德非涼。帝念惟思理。臣心豈自遑。詔催青瑣客。時待紫微郎。定難輸宸算。勝災減御梁。皇恩思蕩蕩。睿澤轉洋洋。偃臥雖非晚。艱難亦備嘗。舜庭招諫鼓。漢殿上書囊。儉德遵三尺。清朝俟一匡。世隨魚父醉。身效接輿狂。竄逐同天寶。遭罹異建康。道孤悲海澨。家遠隔天潢。卒歲貧無褐。經秋病泛漳。似魚甘去乙。比蟹未成筐。守道慙無補。趨時愧不臧。殷牛常在耳。晉豎欲潛盲。忸恨山思板。懷歸海欲航。角吹魂悄悄。笛引淚浪浪。亂覺乾坤窄。貧知日月長。勢將隨鶴列。忽喜遇鴛行。已報新回駕。仍聞近納隍。文風銷劍楯。禮物換旂常。紫闥重開序。青衿再設庠。黑頭期命爵。頰尾尙憂魴。昊坂嘶騏驥。岐山集鳳皇。詞源波浩浩。諫署玉鏘鏘。飼雀曾傳慶。烹蛇詎有殃。設弓揮勁鏃。匣劍淬神鋸。諤諤寧慚直。堂堂不謝張。曉風趨建禮。夜月直文昌。去國時雖久。安邦志不常。良金鑪自躍。美玉櫃難藏。北望心如旆。西歸律變商。跡隨江燕去。心逐塞鴻翔。晚翠籠桑塢。斜暉挂竹堂。路愁千里月。田愛萬斯箱。伴釣歌前浦。隨樵上遠岡。鷺眠依晚嶼。烏浴上枯楊。驚夢緣欹枕。多吟爲倚廊。訪僧紅葉寺。題句白雲房。颿外青楓老。尊前紫菊芳。夜燈銀耿耿。曉露玉瀼瀼。異國輒傾蓋。歸塗俟併糧。身雖留震澤。心已過雷塘。執友知誰在。家山各已荒。海邊登桂楫。煙外泛雲檣。巢樹禽思越。嘶風馬戀羌。寒聲愁聽杵。空館厭聞螿。

望闕飛華蓋。趨朝振玉璫。米慙無薏苡。麩喜有桃榔。話別心重結。傷時淚一滂。佇歸蓬島後。綸詔潤青絳。

全五代詩卷四十二

前蜀

韋莊

咸陽懷古

城邊人倚夕陽樓。城上雲凝萬古愁。山色不知秦苑廢。水聲空傍漢宮流。李斯不向倉中悟。徐福應無物外遊。莫怪楚吟偏斷骨。野烟蹤跡似東周。

夏初與候補闕江南有約。同泛淮汴。西赴行朝。莊自九驛路先至。甬橋。補闕由淮楚。續至泗上。寢病旬日。遽聞捐館。回首悲慟。因成長句四韻弔之。

本約同來謁帝闈。忽隨川浪去東奔。九重聖主方虛席。千里高堂尙倚門。世德只應榮伯仲。詩名終自付兒孫。遙憐月落清淮上。寂寞何人弔旅魂。

酬吳秀才雪川相送

一葉南浮去似飛。楚鄉雲水本無依。離心不忍聞春鳥。病眼何堪送落暉。摻袂客從花下散。棹舟人回鏡中歸。夫君別我應惆悵。十五年來識素衣。

雜感

莫悲建業荆榛滿。昔日繁華是帝京。莫愛廣陵臺榭好。也曾蕪沒作荒城。魚龍爵馬皆如夢。風月烟花豈有情。行客不勞頻悵望。古來朝市歎衰榮。

婺州屏居蒙右省王拾遺車枉降訪病中延候不得因成寄謝

三年流落臥漳濱。王粲思家拭淚頻。畫角莫吹殘月夜。病心方憶故園春。自爲江上樵蘇客。不識天邊侍從臣。怪得白鷗驚去盡。綠蘿門外有朱輪。

送范評事入關

寂寥門戶寡相親。日日頻來只有君。正喜琴尊長作伴。忽攜書劍遠辭羣。傷心柳色離亭見。聒耳蟬聲故國聞。爲報明年杏園客。與留絕豔待終軍。

咸通

咸通時代物情奢。歡殺金張許史家。破產競留天一樂。鑄山爭買洞中花。諸郎宴罷銀燈合。僊子遊迴壁月斜。人意似知今日事。急催弦管送年華。

寄湖州舍弟

半年江上愴離襟。好把新詩喜又吟。多病似逢秦氏藥。久貧如得顧家金。雲煙但有穿楊志。塵土多無作吏心。何況別來辭輕麗。不愁明代少知音。

絳州過夏留獻鄭尙書

朝朝沈醉引金船。不覺西風滿樹蟬。光景暗消銀燭下。夢魂長寄玉輪邊。因循每被時流誚。奮發須由國士憐。明月客腸何處斷。綠槐風裏獨揚鞭。

江臯贈別

金管多情恨解攜。一聲歌罷客如泥。江亭繫馬綠楊短。野岸維舟春草齊。帝子夢魂烟水闊。謝公詩思碧雲低。風前不用頻揮手。我有家山白日西。

和同年韋學士華下途中見寄

綠楊城郭雨淒淒。過盡千輪與萬蹄。送我獨游三蜀路。羨君新上九霄梯。馬驚門外山如活。花笑尊前客似泥。正是清和好時節。不堪離恨劍門西。

傷灼灼

灼灼蜀之麗人也。近聞貧且老。殂落于成都酒市中。因以四韻弔之。

嘗聞灼灼麗於花。雲髻盤時未破瓜。桃臉曼長橫綠水。玉肌香膩透紅紗。多情不住神仙界。薄命曾嫌富貴家。流落錦江無處問。斷魂飛作碧天霞。

漢州

比儂初到漢州城。郭邑樓臺觸目驚。松桂影中旗旆色。芰荷風裏管絃聲。人心不以經離亂。時運還應卻太平。十日醉眠金雁驛。臨歧無限臉波橫。

獨吟二首

一作悼
亡姬作

默默無言惻惻悲。閑吟獨傍菊花籬。只今已作經年別。此後誰爲幾歲期。開篋每尋遺念物。倚樓空綴悼亡詩。夜來孤枕空腸斷。窗月斜輝夢覺時。
六七年來春又秋。也同歡笑也同愁。纔聞及第心先喜。試說求婚淚便流。幾爲妬來頻斂黛。每思閑事不梳頭。如今悔恨將何益。腸斷千休與萬休。

下第題青龍寺僧房

千蹄萬轂一枝芳。要路無媒果自傷。題柱未期歸蜀國。曳裾何處謁吳王。馬嘶春陌金羈鬧。鳥睡花林繡羽香。酒薄恨濃消不得。卻將惆悵問支郎。

虢州澗東村居作

東南騎馬出郊坰。迴首寒烟隔郡城。清澗漲時翹鷺喜。綠桑疎處哺牛鳴。兒童見少生於客。奴僕驕多倨似兄。試望家田還自適。滿畦秋水稻苗平。

尹喜宅

荒原秋殿柏蕭蕭。何代風煙占寂寥。紫氣已隨僊仗去。白雲空向帝鄉消。濛濛暮雨春雞唱。漠漠寒蕪雪兔跳。欲問靈蹤無處所。十洲空闊閬山遙。

途中望雨懷歸

滿空寒雨漫霏霏。去路雲深鎖翠微。牧豎遠當煙草立。飢禽閑傍渚田飛。誰家樹壓紅榴折。幾處籬懸白菌肥。對此不堪鄉外思。荷蓑遙羨釣人歸。

灞陵道中作

春橋南望水溶溶。一桁晴山倒碧峰。秦苑落花零露溼。灞陵新酒撥醅濃。青龍天矯盤雙闕。丹鳳雛雛隔九重。萬古行人離別地。不堪吟罷夕陽鐘。

秋日早行

上馬蕭蕭襟袖涼。路穿禾黍繞宮牆。半山殘月露華冷。一岸野風蓮萼香。煙外驛樓紅隱隱。渚邊雲樹暗蒼蒼。行人自是心如火。兔走烏飛不覺長。

歎落花

一夜霏微露溼烟。曉來和淚喪嬋娟。不隨殘雪埋芳草。盡逐香風上舞筵。西子去時遺笑靨。謝娥行處落金鈿。飄紅墮白堪惆悵。少別穠華又隔年。

宮怨

一辭同輦閉昭陽。耿耿寒宵禁漏長。釵上翠禽應不返。鏡中紅豔豈重芳。螢低夜色棲瑤草。水咽秋聲傍粉牆。展轉令人思蜀賦。解將惆悵感君王。

關河道中

槐柏蟬聲柳市風。驛樓高倚夕陽東。往來千里路長在。聚散十年人不同。但見時光流似箭。豈知天道曲如弓。平生志業匡堯舜。又擬滄浪學釣翁。

題盤豆驛水館後軒

極目晴川展畫屏。地從桃塞接蒲城。灘頭鷺占清波立。原上人侵落照耕。去雁數行天際沒。孤雲一點淨中生。憑軒盡日不迴首。楚水吳山無限情。

對雪獻薛常侍

璚林瑤樹忽珊珊。急帶西風下晚天。皓鶴灑灑飛不辨。玉山重疊凍相連。松裝粉穗臨窗亞。水結冰錐簇溜懸。門外寒光利如劍。莫推紅袖訴金船。

題裴端公郊居

暫隨紅旆佐藩方。高跡終朝臥故鄉。已近水聲開澗戶。更侵山色架書堂。蒲生岸腳青刀利。柳拂波心綠帶長。莫奪野人樵牧興。白雲不識繡衣郎。

貴公子

大道青樓御苑東。玉欄仙杏壓枝紅。金鈴犬吠梧桐月。朱鬣馬嘶楊柳風。流水帶花穿巷陌。夕陽和樹入簾櫳。瑤池宴罷歸來醉。笑說君王在月宮。

聽趙秀才彈琴

滿匣冰泉咽又鳴。玉音閑澹入神清。巫山夜雨弦中起。湘水清波指下生。蜂簇野花吟細韻。蟬移高柳迸殘聲。不須更奏幽蘭曲。卓氏門前月正明。

觀獵

苑牆東畔欲斜暉。傍苑穿花兔正肥。公子喜逢朝罷日。將軍誇換戰時衣。鶻翻錦翅雲中落。犬帶金鈴草上飛。直待四郊高鳥盡。掉鞍齊向國門歸。

三堂東湖作

滿塘秋水碧泓澄。十畝菱花晚鏡清。影動新橋橫蝟蝟。岸鋪芳草睡鷓鴣。蟾投夜魄當湖落。嶽倒秋蓮入浪生。何處最添詩客興。黃昏煙雨亂蛙聲。

放榜日作

一聲天鼓闢金扉。三十仙才上翠微。葛水霧中龍乍變。緱山煙外鶴初飛。鄒陽暖豔催花發。太皞春光簇馬歸。回首便辭塵土世。彩雲新換六銖衣。

寄薛先輩

懸知回日綵衣榮。仙籍高標第一名。瑤樹帶風侵物冷。玉山和雨射人清。龍翻瀚海波濤壯。鶴出金籠燕雀驚。不說文章與門地。自然毛骨是公卿。

寄從兄遵

江上秋風正釣鱸。九重天子夢翹車。不將高臥邀劉主。自吐清談護漢儲。滄海十年龍景斷。碧雲千里雁行疎。相逢莫話歸山計。明日東封待直廬。

登漢高廟閑眺

獨尋仙境上高原。雲雨深藏古帝壇。天畔晚風青簇簇。檻前春樹碧團團。參差郭外樓臺小。斷續風中鼓角殘。一帶遠光何處水。釣舟閑繫夕陽灘。

耒陽縣浮山神廟

一郡皆傳此廟靈。廟前松桂古今青。山曾堯代浮洪水。地有唐臣奠綠醑。遶座香風吹寶蓋。傍簷煙雨溼巖扃。爲霖自可成農歲。何用興師遠伐邢。

三堂早春

獨倚危樓四望遙。杏花春陌馬聲驕。池邊冰刃暖初落。山上雪稜寒未銷。溪送綠波穿郡宅。日移紅影度村橋。主人年少多情味。笑換金龜解珥貂。

贈雲陽裴明府

南北三年一解攜。海爲深谷岸爲蹊。已聞陳勝心降漢。誰爲田橫國號齊。暴客至今猶戰鶴。故人何處尙驅雞。歸來能作煙波伴。我有漁舟在五溪。

長年一作感懷

長年方悟少年非。人道新詩勝舊詩。十畝野塘留客釣。一軒春雨對僧棋。花間醉任黃鶯語。亭上吟從白鷺窺。大道不將爐冶去。有心重築太平基。

辛丑年

九衢漂杵已成川。塞上黃雲戰馬閑。但有羸兵填渭水。更無奇士出商山。田園已沒紅塵裏。弟妹相逢白刃間。西望翠華殊未返。淚痕空溼劍文斑。

思歸

暖絲無力自悠揚。牽引東風斷客腸。外地見花終寂寞。異鄉聞樂更淒涼。紅垂野岸櫻還熟。綠染汀草又芳。舊里若爲歸去好。子期凋謝呂安亡。

憶昔

昔年曾向五陵遊。子夜歌清月滿樓。銀燭樹前長似晝。露桃華下不知秋。西園公子名無忌。南國佳人號莫愁。今日亂離俱是夢。夕陽唯見水東流。

宿泊孟津寄三堂友人

解纜西征未有期。槐花又逼桂花時。鴻臚陌上歸耕晚。金馬門前獻賦遲。只恐愁苗生兩鬢。不堪離恨入

雙眉分明昨夜南池夢。還抱漁竿詠楚詞。

天井關

太行山上雲深處。誰向雲中築女牆。短綆詎能垂玉整。繚垣何用學金湯。斷開嵐翠爲高壘。截斷雲霞作巨防。守吏不教飛鳥過。赤眉何路到吾鄉。

夜景

滿庭松桂雨餘天。宋玉秋聲韻蜀弦。烏兔不知多事世。星辰長似太平年。誰家一笛吹殘暑。何處雙砧擣暮煙。欲把傷心問明月。素娥無語淚娟娟。

對梨花贈皇甫秀才

林上梨花雪壓枝。獨攀瓊豔不勝悲。依前此地逢君處。還是去年今日時。且戀殘陽留綺席。莫推紅袖訴金卮。騰騰戰鼓正多事。須信明朝難重持。

題潁源廟

曾是巢由棲隱地。百川唯說潁源清。微波乍向雲根吐。去浪遙衝雪嶂橫。萬木倚簷疎幹直。羣峯當戶曉嵐晴。臨川試問堯年時。猶被封人勸濯纓。

新正日商南道中作寄李明府

相看又見歲華忻。依舊楊朱拭淚巾。踏雪偶因尋戴客。論文還比聚星人。嵩山不改千年色。洛邑長生一

路塵今日與君同避世。卻憐無事是家貧。

饒州餘干縣琵琶洲有故韓賓客宣城裴尙書修行李侍郎舊居遺址猶存客有過之感舊因以

和吟

琵琶洲近斗牛星。鸞鳳曾於此放情。已覺地靈因昴降。更聞川媚有珠生。一灘紅樹留佳氣。萬古清弦續政聲。戟戶盡移天上去。里人空說舊簪纓。

鄜州留別張員外

江南相送君山下。塞北相逢朔漠中。三楚故人皆是夢。十年陳事只如風。莫言身世他時異。且喜琴尊數日同。惆悵卻愁明日別。馬嘶山店雨濛濛。

過漢陂懷舊

辛勤曾寄玉峯前。一別雲溪二十年。三徑荒涼迷竹樹。四鄰凋謝變桑田。美陂可是當時事。紫閣空餘舊日煙。多少亂離無處問。夕陽吟罷涕漣然。

和人春暮書事寄崔秀才

半掩朱門白日長。晚風輕墮落梅妝。不知芳草情何限。只怪遊人思易傷。纔見早春鶯出谷。已驚新夏燕巢梁。相逢只賴如澠酒。一曲狂歌入醉鄉。

邊上逢薛秀才話舊

前年同醉武陵亭。絕倒閑談坐到明。也有絳脣歌白雪。更憐紅袖奪金觥。秦雲一片如春夢。楚市千燒作故城。今日皤然對芳草。不勝東望涕交橫。

送福州王先輩南歸

豫章城下偶相逢。自說今方遇主公。八韻賦吟梁苑雪。六銖衣惹杏園風。名標玉籍仙壇上。家寄閩山畫障中。明日一杯何處別。綠楊煙岸雨濛濛。

夜雪泛舟遊南溪

大江西面小溪斜。入竹穿松似若耶。兩岸巖風吹玉樹。一灘明月曬銀砂。因尋野渡逢漁舍。更泊前灣上酒家。去去不知歸路遠。棹聲煙裏獨嘔啞。

銅儀

銅儀一夜變葭灰。暖律還吹嶺上梅。已喜漢官今再覩。更驚堯歷又重開。窗中遠岫青如黛。門外長江綠似苔。誰念閉關張仲蔚。滿庭風雨長蒿萊。

含香

含香高步已難陪。鶴到清霄勢未回。遇物旋添芳草句。逢春寧滯碧雲才。微紅幾處花心吐。嫩綠誰家柳眼開。卻去金鑾爲近侍。便辭鷗鳥不歸來。

春雲

春雲春水兩溶溶。倚郭樓臺晚翠濃。山好只因人化石。地靈曾有劍爲龍。官辭鳳闕頻經歲。家住峨眉第幾峯。王粲不知多少恨。夕陽吟斷一聲鐘。

雲散

雲散天邊落照和。關關春樹鳥聲多。劉伶避世唯沈醉。甯戚傷時亦浩歌。已恨歲華添皎鏡。更悲人事逐頽波。青雲自有鵷鴻待。莫說他山好薜蘿。

袁州作

家家生計只琴書。一郡清風似魯儒。山色東南連紫府。水聲西北屬洪都。煙霞盡入新詩卷。郭邑閑開古畫圖。正是江村春酒熟。更聞春鳥勸提壺。

題袁州謝秀才所居

主人年少已能詩。更有松軒挂夕暉。芳草似袍連徑合。白雲如鳥傍簷飛。但將竹葉消春恨。莫遣楊花上客衣。若有前山好煙雨。與君吟到暝鐘歸。

謁巫山廟

亂猿啼處訪高唐。路入煙霞草木香。山色未能忘宋玉。水聲猶似哭襄王。朝朝暮暮陽臺下。爲雨爲雲楚國亡。惆悵廟前無限柳。春來空鬪畫眉長。

鷓鴣

南禽無侶似相依。錦翅雙雙傍馬飛。孤竹廟前啼暮雨。汨羅祠畔弔殘暉。秦人只解歌爲曲。越女空能畫作衣。懊惱澤家非有恨。年年長憶鳳城歸。

送李秀才歸荆溪

八月中秋月正圓。送君吟上木蘭船。人言格調勝元度。我愛篇章敵浪僊。晚渡去時衝細雨。夜灘何處宿寒烟。楚王宮去陽臺近。莫倚風流滯少年。

洪州送西明寺省上人遊福建

記得初騎竹馬年。送師來往御溝邊。荆榛已失當時路。槐柳全無舊日煙。遠自嵇山遊楚澤。又從廬岳去。閩川新春闕下應相見。紅杏花中覓酒僊。

泛鄱陽湖

四顧無邊鳥不飛。大波驚隔楚山微。紛紛雨外靈均過。瑟瑟雲中帝子歸。迸鯉似梭投遠浪。小舟如葉傍斜暉。鷗夷去後何人到。愛者雖多見者稀。

黃藤山下聞猿

黃藤山下駐歸程。一夜號猿弔旅情。入耳便能生百恨。斷腸何必待三聲。穿雲宿處人難見。望月啼時兔正明。好笑五陵年少客。壯心無事也沾纓。

章江作

杜陵歸客正徘徊。玉笛誰家叫落梅。之子棹從天外去。故人書自日邊來。楊花慢惹霏霏雨。竹葉閑傾滿滿杯。欲問維揚舊風月。一江紅樹亂猿哀。

九江逢盧員外

前年風月宿琴堂。大媚僊山近帝鄉。別後幾沾新雨露。亂來猶記舊篇章。陶潛豈是銅符吏。田鳳終爲錦帳郎。莫怪相逢倍惆悵。九江煙月似瀟湘。

南昌晚眺

南昌城郭枕江煙。章水悠悠浪拍天。芳草綠遮僊尉宅。落霞紅襯賈人船。霏霏閣上千山雨。嘒嘒雲中萬樹蟬。怪得地多章句客。庾家樓在斗牛邊。

湘中作

千重煙樹萬重波。因便何妨弔汨羅。楚地不知秦地亂。南人空怪北人多。臣心未肯教遷鼎。天道還應欲止戈。否去泰來終可待。夜寒休唱飯牛歌。

桐廬縣作

錢塘江盡到桐廬。水碧山青畫不如。白羽鳥飛嚴子瀨。綠蓑人釣季鷹魚。潭心倒影時開合。谷口閑雲自卷舒。此境只應詞客愛。投文空弔木元虛。

東陽贈別

繡袍公子出旌旗。送我搖鞭入翠微。大抵行人難訴酒。就中辭客易沾衣。去時此地題橋去。歸日何年佩印歸。無限別情言不得。回看溪柳恨依依。

長安清明

早是傷春夢雨天。可堪芳草更芊芊。內官初賜清明火。上相閑分白打錢。紫陌亂嘶紅叱撥。綠楊高映畫鞦韆。遊人記得承平事。暗喜風光似昔年。

使院黃葵花

薄妝新著淡黃衣。對捧金鑪侍醮遲。向日似矜傾國貌。倚風如唱步虛詞。乍開檀炷疑聞語。試與雲和必解吹。爲報同人看來好。不禁秋露卽離披。

奉和觀察郎中春暮憶花言懷覓寄四韻之什

天畔峨眉簇簇青。楚雲何處隔重扃。落花帶雪埋芳草。春雨和風溼畫屏。對酒莫辭衝暮角。望鄉誰解倚南亭。惟君信我多惆悵。只願陶陶不願醒。

奉和左司郎中春物暗度感而成章

纔喜新春已暮春。夕陽吟殺倚樓人。錦江風散霏霏雨。花市香飄漠漠塵。今日尙追巫峽夢。少年應遇洛川神。有時自患多情病。莫是生前宋玉身。

全五代詩卷四十三

前蜀

韋莊

贈邊將

昔因征遠向金微。馬出榆關一鳥飛。萬里只攜孤劍去。十年空逐塞鴻歸。手招都護新降虜。自著文皇舊賜衣。只待煙塵報天子。滿頭霜雪爲兵機。

春日

忽覺東風景漸遲。野梅山杏暗芳菲。落星樓上吹殘角。偃月營中挂夕暉。旅夢亂隨蝴蝶散。離魂漸逐杜鵑飛。紅塵遮斷長安陌。芳草王孫暮不歸。

早秋夜作

翠簾初清暑半銷。撤簾松韻送輕飈。莎庭露永琴書潤。山郭月明砧杵遙。傍砌綠苔鳴蟋蟀。遶簷紅樹織蠨蛸。不須更作悲秋賦。王粲辭家鬢已凋。

又聞湖南荆渚相次陷沒

幾時聞唱凱旋歌。處處屯兵未倒戈。天子只憑紅旆壯。將軍空恃紫髯多。屍填漢水連荆阜。血染湘雲接

楚波莫問流離南越事。戰餘空有舊山河。

家叔南遊卻歸因獻賀

繚繞江南一歲歸。歸來行色滿戎衣。長聞鳳詔徵兵急。何事龍韜獻捷稀。旅夢遠依湘水闊。離魂空伴越禽飛。遙知倚棹思家處。澤國煙深暮雨微。

洛陽吟

時大駕在蜀。巢寇未平。洛中寓居作七言。

萬戶千門夕照邊。開元時節舊風煙。宮官試馬遊三市。舞女乘舟上九天。胡騎北來空進主。漢皇西去竟昇仙。如今父老偏垂淚。不見承平四十年。

過舊宅

華軒不見馬蕭蕭。廷尉門人久寂寥。朱檻翠樓爲卜肆。玉欄僊杏作春樵。塔前雨落鴛鴦瓦。竹裏苔封螭竦橋。莫問此中銷歇寺。娟娟紅淚滴芭蕉。

喻東軍

四年龍馭守峨嵎。鐵馬西來步步遲。五運未教移漢鼎。六韜何必待秦師。幾時鸞鳳歸丹闕。到處烏鳶從白旗。獨把一樽和淚酒。隔雲遙奠武侯祠。

清河縣樓作

有客微吟獨凭樓。碧雲紅樹不勝愁。盤鷗迴印天心沒。遠水斜牽日腳流。千里戰塵連上苑。九江歸路隔東周。故人此地揚帆去。何處相思雪滿頭。

北原閑眺

春城迴首樹重重。立馬平原夕照中。五鳳灰殘金翠滅。六龍遊去市朝空。千年王氣浮清洛。萬古坤靈鎮碧嵩。欲問向來陵谷事。野桃無語淚花紅。

贈戍兵

漢皇無事暫遊汾。底事狐狸嘯作羣。夜指碧天占晉分。曉磨孤劍望秦雲。紅旌不卷風長急。畫角閑吹日又曛。止竟有征須有戰。洛陽何用久屯軍。

覩軍迴戈

關中羣盜已心離。關外猶聞羽檄飛。御苑綠莎嘶戰馬。禁城寒月搗征衣。漫教漢信兵塗地。不及劉琨嘯解圍。昨日屯軍還夜遁。滿車空載洛神歸。

中渡晚眺

魏王堤畔草如煙。有客傷時獨扣舷。妖氣欲昏唐社稷。夕陽空照漢山川。千重碧樹籠春苑。萬縷紅霞襯碧天。家寄杜陵歸不得。一迴回首一潸然。

河內別村業閑題

阮氏清風竹巷深。滿溪松竹似山陰。門當谷路多樵客。地帶河聲足水禽。閑伴爾曹雖適意。靜思吾道好霑襟。鄰翁莫問傷時事。一曲高歌夕照沈。

聞官軍繼至未覩凱旋

嫖姚何日破重圍。秋草深來戰馬肥。已有孔明傳將略。更聞王導得神機。陣前鼙鼓晴應響。城上烏鳶飽不飛。何事小臣偏注目。帝鄉遙羨白雲歸。

和集賢侯學士分司丁侍御秋日雨霽之作

洛岸秋晴夕照長。鳳樓龍闕倚清光。玉泉山淨雲初散。金谷樹多風正涼。席上客知蓬島路。坐中寒有柏臺霜。多慙十載遊梁士。卻伴賓鴻入帝鄉。

題安定張使君

器度風標合出塵。桂宮何負一枝新。成丹始見金無滓。衝斗方知劍有神。憤氣不銷頭上雪。政聲空布海邊春。中興若繼開元事。堪向龍池作近臣。

洛北村居

十畝松篁百畝田。歸來方屬大兵年。岩邊石室低臨水。雲外嵐峯半入天。鳥勢去投金谷樹。鐘聲遙出上陽煙。無人說得中興事。獨倚斜暉憶仲宣。

立春

青帝東來日馭遲。煖烟輕逐曉風吹。屬袍公子樽前覺。錦帳佳人夢裏知。雪圃乍開紅菜甲。綵幡新剪綠楊絲。殷勤爲作宜春曲。題向花牋帖繡楣。

東遊遠歸

扣角干名計已疎。劍歌休恨食無魚。辭家柳絮三春半。臨路槐花七月初。江上欲尋漁父醉。日邊時得故人書。青雲不識楊生面。天子何由問子虛。

上元縣

湘西作

南朝三十六英雄。角逐興亡盡此中。有國有家皆是夢。爲龍爲虎亦成空。殘花舊宅悲江令。落日青山弔謝公。止竟霸圖何物在。石麟無主臥秋風。

江上逢史館李學士

前年分袂陝城西。醉凭征軒日欲低。去浪指期魚必變。出門回首馬空嘶。關河自此爲征壘。城闕於今陷

戰聲。

時巢寇未平

誰爲世途陵是谷。燕來還識舊巢泥。

謁蔣帝廟

建業城邊蔣帝祠。素髯清骨舊風姿。江聲似激秦軍破。山勢如匡晉祚危。殘雪嶺頭明組練。晚霞簷外簇旌旗。金陵客路方流落。空祝回鑾奠酒卮。

聞再幸梁洋

纔喜中原息戰輦。又聞天子幸巴西。延燒魏闕非關燕。太狩陳倉不爲雞。興慶玉龍寒自躍。昭陵石馬夜空嘶。遙思萬里行宮夢。太白山前月欲低。

王道者

五雲遙指海中央。金鼎曾傳肘後方。三島路歧空有月。十洲花木不知霜。因攜竹杖聞龍氣。爲使僊童帶橘香。應笑我曹身是夢。白頭猶自學詩狂。

陪金陵府相中堂夜宴

滿耳笙歌滿眼花。滿樓珠翠勝吳娃。因知海上神仙窟。只似人間富貴家。繡戶夜攢紅燭市。舞衣晴曳碧天霞。卻愁宴罷青蛾散。楊子江頭月半斜。

和侯秀才同友生泛舟溪中相招之作

嵇阮相將棹酒船。晚風侵浪水侵舷。輕如控鯉初離岸。遠似乘槎欲上天。雨外鳥歸吳苑樹。鏡中人入洞庭煙。憑君不用回舟疾。今夜西江月正圓。

代書寄馬

驅馳曾在五侯家。見說初生自渥洼。鬃白似披梁苑雪。頸肥如撲杏園花。休嫌綠綬嘶貧舍。好著紅纓入使衙。穩上雲衢千萬里。年年長踏魏堤沙。

題淮陰侯廟

滿把椒漿奠楚祠。碧幢黃鉞舊英威。能扶漢代成王業。忍見唐民陷戰機。雲夢去時高鳥盡。淮陰歸日故人稀。如何不借平齊策。空看長星落賊圍。

觀濶西府相畋遊

十里旌旗十萬兵。等閑遊獵出軍城。紫袍日照金鵝鬪。紅旆風吹畫虎羆。帶箭彩禽雲外落。避鵬寒兔月中驚。歸來一路笙歌滿。更有僊娥載酒迎。

題姑蘇凌處士莊

一簇林亭返照間。門當官道不曾關。花深遠岸黃鶯鬧。雨急春塘白鷺閑。載酒客尋吳苑寺。倚樓僧看洞庭山。怪來話得僊中事。新有人從物外還。

贈漁翁

草衣荷笠鬢如霜。自說家編楚水陽。滿岸秋風吹枳橘。遶陂煙雨種菰蔣。蘆刀夜鱸紅鱗膩。水甌朝蒸紫芋香。曾向五湖期范蠡。爾來空闊久相忘。

過揚州

當年人未識兵戈。處處青樓夜夜歌。花發洞中春日永。月明衣上好風多。淮王去後無雞犬。煬帝歸來葬綺羅。二十四橋空寂寂。綠楊摧折舊官河。

寄右省李起居

既向駕行接雁行，便應雙拜紫薇郎。
纔聞闕下徵書急，已覺回朝草詔忙。
白馬似憐朱紱貴，綵衣遙惹御
爐香。多慙十載浮梁客，未換青襟侍素王。

對雨獨酌

榴花新釀綠於苔，對雨閑傾滿滿杯。
荷鋪醉翁真達者，臥雲逋客竟悠哉。
能詩豈是經時策，愛酒原非命
世才。門外綠蘿連洞口，馬嘶應是步兵來。

汴堤行

欲上隋堤舉步遲，隔雲烽燧叫非時。
纔聞破虜將休馬，又道征遼再出師。
朝見西來爲過客，暮看東去作
浮屍。綠楊千里無飛鳥，日落空投舊店基。

自孟津舟西上雨中作

秋煙漠漠雨濛濛，不卷征颿任晚風。
百口寄安滄海上，一身逃難綠林中。
來時楚岸楊花白，去日隋堤蓼
穗紅。卻到故園翻似客，歸心迢遞秣陵東。

過內黃縣

相州吹角欲斜陽，匹馬搖鞭宿內黃。
僻縣不容投刺客，野陂時遇射鵬郎。
雲中粉蝶新城壘，店後荒郊舊
戰場。猶指去程千萬里，秣陵煙樹在何鄉。

江上題所居

故人相別盡朝天。苦竹江頭盡閉關。落日亂蟬蕭帝寺。碧雲歸鳥謝家山。青州從事來偏熟。泉布先生老漸慳。不是對花常酩酊。永嘉時代不如閑。

將卜蘭芷村居留別郡中在仕

蘭芷江頭寄斷蓬。移家空載一颿風。伯倫嗜酒還因亂。平子歸田不爲窮。避世漂零人境外。結茅依約畫屏中。從今隱去應難覓。深入蘆花作釣翁。

和陸諫議避地寄東陽進退未決見寄

未歸天路紫雲深。暫駐東陽歲月侵。入洛聲華當世重。閱周章句滿朝吟。開爐夜看黃芽鼎。臥甕閑欹白玉簪。讀易草元人不會。憂君心是致君心。

山墅閑題

邈迤前岡壓後岡。一村桑柘好斜陽。主人饋餉炊紅黍。鄰父攜竿釣紫魴。靜極卻嫌流水鬧。閑多翻笑野雲忙。有名不那無名客。獨閉衡門避建康。

江上逢故人

前年送我曲江西。紅杏園中醉似泥。今日逢君越溪上。杜鵑花發鷓鴣啼。來時舊里人誰在。別後滄波路幾迷。江畔玉樓多美酒。仲宣懷土莫淒淒。

旅中感遇寄呈李祕書昆仲

南望愁雲鎖翠微。謝家樓閣雨霏霏。劉楨病後新詩少。阮籍貧來好客稀。猶喜故人天外至。許將孤劍日邊歸。懷鄉不怕嚴陵笑。只待秋風別釣磯。

江上村居

本無踪跡戀柴扃。世亂須教識道情。顛倒夢魂愁裏得。撇奇詩句望中生。花緣豔絕栽難好。山爲看多詠不成。聞道漢軍新破虜。使來仍說近離京。

江邊吟

江邊烽燧幾時休。江上行人雪滿頭。誰信亂離花不見。只應惆悵水東流。陶潛政事千杯酒。張翰生涯一葉舟。若有片帆歸去好。可堪重倚仲宣樓。

江南送李明府入關

雨花煙柳傍江邨。流落天涯酒一罇。分首不辭多下淚。回頭唯恐更消魂。我爲孟館三千客。君繼寧王五代孫。正是中興磐石重。莫將顛顛入都門。

柳谷道中作卻寄

馬前紅葉正紛紛。馬上離情斷殺魂。曉發獨辭殘月店。暮程遙宿隔雲村。心知岳色留秦地。夢逐河聲出禹門。莫怪苦吟鞭拂地。有誰傾蓋待王孫。

訪含宏山僧不遇留題精舍

滿院桐花鳥雀喧。寂寥芳草茂芊芊。吾師正遇歸山日。閑客空題到寺年。池竹閉門教鶴守。琴書開篋任僧傳。人間不自尋行跡。一片孤雲在碧天。

東林寺再遇僧益大德

見師初事懿皇朝。三殿歸來白馬驕。上講每教傾國聽。承恩偏得內官饒。當時可愛人如畫。今日相逢鬢已凋。若向君門逢舊友。爲傳音信到雲霄。

西塞山下作

西塞山前水似藍。亂雲如絮滿澄潭。孤峯漸映湓城北。片月斜生夢澤南。巖動曉煙烹紫蕨。雲和香蔕摘黃柑。他年卻棹扁舟去。終傍蘆花結一菴。

夏口行寄婺州諸弟

回頭煙樹各天涯。婺女星邊遠寄家。盡眼楚波連夢澤。滿衣春雪落江花。雙雙得伴爭如雁。一一歸巢卻羨鷗。誰道我隨張博望。悠悠空外泛僊槎。

南省伴直

甲寅年自江南到京後作

文昌二十四僊曹。盡倚紅簷種露桃。一洞煙霞人跡少。六行槐柳鳥聲高。星分夜彩寒侵帳。蘭惹春香綠

映袍何事愛留詩。客宿滿庭風雨竹蕭騷。

鄂杜舊居二首

卻到山陽事事非。谷雲谿鳥尙相依。阮咸貧去田園盡。向秀歸來父老稀。秋雨幾家紅豆熟。野塘何處錦鱗肥。年年爲獻東堂策。長是蘆花別釣磯。

一徑尋村渡碧溪。稻花香澤水千畦。雲中寺遠磬難識。竹裏巢深鳥易迷。紫菊亂開連井合。紅榴初綻拂簷低。歸來滿把如澆酒。何用傷時歎鳳兮。

投寄舊知

卻將顛顛入都門。自喜青雲足故人。萬里有家留百越。十年無路到三秦。推殘不是當時貌。流落空餘舊日貧。多謝青雲好知己。莫教歸去重沾巾。

題汧陽縣馬跑泉李學士別業

水滿寒塘菊滿籬。籬邊無限彩禽飛。西園夜雨紅櫻熟。南畝清風白稻肥。草色自留閑客住。泉聲如待主人歸。九霄岐路忙於火。肯戀斜陽守釣磯。

綏州作

雕陰無樹水難流。雉堞連雲古帝州。帶雨晚鴉鳴遠戍。望鄉孤客倚高樓。明妃去日花應笑。蔡琰歸時鬢已秋。一曲單于暮烽起。扶蘇城上月如鉤。

與東吳生相遇

及第後
出關作

十年身事各如萍。白首相逢淚滿纓。老去不知花有態。亂來唯覺酒多情。貧疑陋巷春偏少。貴想豪家月最明。且對一尊開口笑。未衰應見泰階平。

庭前桃

曾向桃源爛漫遊。也同漁父泛僊舟。皆言洞裏千株好。未勝庭前一樹幽。帶雨似垂湘女淚。無言如伴息媯愁。五陵公子饒春恨。莫引香風上酒樓。

病中聞相府夜宴戲贈集賢盧學士

滿筵紅蠟照香鈿。一夜歌鐘欲沸天。花裏亂飛金錯落。月中爭認繡連乾。尊前莫話詩三百。醉後寧辭酒十千。無那兩三新進士。風流長得飲徒憐。

出關

馬嘶煙岸柳陰斜。東去關山路轉賒。到處因循緣嗜酒。一生惆悵爲判花。危時祇合身無著。白日那堪事有涯。正是灞陵春耐綠。仲宣何事獨辭家。

過樊川舊居

時在華州駕前
奉使入蜀作

卻到樊川訪舊遊。夕陽衰草杜陵秋。應劉去後苔生閣。嵇阮歸來雪滿頭。能說亂離唯有燕。解偷閑暇不

如鷗千桑萬海無人見。橫笛一聲空淚流。

汧陽間

一作汧

陽縣閣

汧水悠悠去似緝。遠山如畫翠眉橫。僧尋野渡歸吳嶽。雁帶斜陽入渭城。邊靜不收蕃帳馬。地貧惟賣隴山鷄。牧童何處吹羌笛。一曲梅花出塞聲。

悼亡姬

鳳去鸞歸不可尋。十洲仙路彩雲深。若無少女花應老。爲有姮娥月易沈。竹葉豈能消積恨。丁香空解結同心。湘江水闊蒼梧遠。何處相思弄舜琴。

龍潭

激石懸流雪滿灣。九龍潛處野雲閑。欲行甘雨四天下。且隱澄潭一頃間。浪引浮槎依北岸。波分曉日見東山。垂髯倘遇穆王駕。閬苑周流應未還。

下邳感舊

太平廣記。莊幼時常在華山下邳縣僑居。多與鄰巷諸兒會戲。及廣明亂後。再經舊里。追思往事。但有遺蹤。因賦詩以記之云。

昔爲童稚不知愁。竹馬閑乘繞縣遊。曾爲看花偷出郭。也因逃學暫登樓。招他邑客來還醉。僂得先生去始休。今日故人何處問。夕陽衰草盡荒邱。

塗次逢李氏兄弟感舊

御溝西面朱門宅。記得當時好弟兄。曉傍柳陰騎竹馬。夜隈燈影弄先生。巡街趁蝶衣裳破。上屋探雛手腳輕。今日相逢俱老大。憂家憂國盡公卿。

冬日長安感志寄獻虢州崔郎中二十韻

帝里無成久滯淹。別家三度見新蟾。郗詵丹桂無人指。阮籍青襟有淚霑。溪上卻思雲滿屋。鏡中惟怕雪生髯。病如原憲誰能療。蹇似劉禎豈用占。霧雨十年同隱遁。風雷何日振沈潛。吁嗟每被更聲引。歌詠還因酒思添。客舍正甘愁寂寂。郡樓遙想醉恹恹。已聞鈴閣懸新詔。卽向綸闈副具瞻。濟物便同川上楫。慰心還似邑中黔。觀星始覺中郎貴。問俗方知太守廉。宅後綠波棲畫鷁。馬前紅袖簇丹襜。閑招好客斟香蟻。悶對瓊花詠散鹽。積凍慢封寒霰細。暮雲高拔遠峯尖。訟堂無事冰生印。水榭高吟月透簾。松下圍棋期楮允。筆頭飛箭薦陶謙。未知匣劍何時躍。但恐鉛刀不再銛。雖有遠心長擁篲。恥將新劍學編苫。纔驚素節移銅律。又見元冥變玉籤。百口似萍依廣岸。一身如燕戀高簷。如今正困風波力。更向人中問宋纖。

癸丑年下第獻新先輩

五更殘月省牆邊。絳旆蜺旌卓曉烟。千炬火中鶯出谷。一聲鐘後鶴冲天。皆乘駿馬先歸去。獨被羸童笑晚眠。對酒暫時情豁爾。見花依舊淚潛然。未酬闕澤傭書債。猶欠君平賣卜錢。何事欲休休不得。來年公道似今年。

全五代詩卷四十四

前蜀

韋莊四

春早

聞鶯纔覺曉。閉戶已知晴。一帶窗門月。斜穿枕上生。

飲散呈主人

夢覺笙歌散。空堂寂寞秋。更聞城角弄。煙雨不勝愁。

卽事

亂世時偏促。陰天日易昏。無言搔白首。憔悴倚東門。

勉兒子

養爾逢多難。常憂學已遲。辟疆爲上相。何必待從師。

贈姬人

莫恨紅裙破。休嫌白屋低。請看京與洛。誰在舊香閨。

對酒

何用巖棲隱姓名。一壺春酎可忘形。伯倫若有長生術。直到如今醉未醒。

驚秋

不向煙波狎釣舟。強親文墨事儒邱。長安十二槐花陌。曾負秋風多少秋。

送日本國僧敬龍歸

扶桑已在渺茫中。家在扶桑東更東。此去與師誰共到。一船明月一帆風。

古離別

晴煙漠漠柳毵毵。不那離情酒半酣。更把玉鞭雲外指。斷腸春色在江南。

寓言

黃金日日銷還鑄。僊桂年年折又生。兔走烏飛如未息。路塵終見泰山平。

登咸陽縣樓望雨

亂雲如獸出山前。細雨和風滿渭川。盡日空濛無所見。雁行斜去字聯聯。

立春日作

九重天子去蒙塵。御柳無情依舊春。今日不關妃妾事。始知辜負馬嵬人。

寄江南逐客

二年音信阻湘潭。花下相思酒半酣。記得竹齋風雨夜。對床孤枕話江南。

冬夜

睡覺寒爐酒半消。客情鄉夢兩遙遙。無人爲我磨心劍。割斷愁腸一寸苗。

楚行吟

章華臺下草如煙。故郢城頭月似弦。惆悵楚宮雲雨後。露啼花笑一年年。

村笛

簫韶九奏韻淒鏘。曲度雖高調不傷。卻見孤村明月夜。一聲牛笛斷人腸。

題吉澗盧拾遺莊

主人西遊去不歸。滿溪春雨長春薇。怪來馬上詩情好。印破青山白鷺飛。

題許渾詩卷

江南才子許渾詩。字字清新句句奇。十斛明珠量不盡。思林虛作碧雲詞。

殘花

和烟和露雪離披。金蘂紅鬚尙滿枝。十日笙歌一宵夢。苧蘿因

一作
烟 雨失 一作
哭 西施

金陵圖

誰謂傷心畫不成。畫人心逐世人情。君看六幅南朝事。老木寒雲滿故城。

贈野童

羨爾無知野性真。亂搔蓬髮笑看人。閑衝暮雨騎牛去。肯問中興社稷臣。

官莊

江南富民悉以犯酒沒家產。因此以詩諷之。制帥遂改酒法。不入財產。

誰氏園林一簇煙。路人遙指盡長歎。桑田稻澤今無主。新犯香醪沒入官。

解維

又解征帆落照中。暮程還過秣陵東。二一作三年辛苦烟波裏。贏得風姿似釣翁。

雨霽池上作呈侯學士

鹿巾藜杖葛衣輕。雨歇池邊晚吹清。正是如今江上侯。白鱗紅稻紫蓴羹。

江亭酒醒卻寄維揚餞客

別筵人散酒初醒。江步黃昏雨雪零。滿坐綺羅皆不見。覺來紅樹背銀屏。

臺城

江雨霏霏江草齊。六朝如夢鳥空啼。無情最是臺城柳。依舊烟籠十里堤。

旅次甬西見兒童以竹槍紙旗戲爲陣列。主人叟曰。斯子也。三代沒于陣。思所襲祖父讐。予因感之。

已聞三世沒軍營。又見兒孫學戰爭。見爾此言堪慟哭。遣予何日望時平。

東陽酒家贈別

天涯方歎異鄉身。又向天涯別故人。明日五更孤店月。醉醒何處各霑巾。

聞春鳥

雲晴春鳥滿江村。還似長安舊日聞。紅杏花前應笑我。我今憔悴亦羞君。

櫻桃樹

記得花開雪滿枝。和蜂和蝶帶花移。如今花落游蜂去。空作主人惆悵詩。

倚柴關

策杖無言獨倚關。如癡如醉又如閒。孤吟盡日何人會。依約前山似故山。

題七步廊

席門無計那殘陽。更接簷前七步廊。不羨東都丞相宅。每行吟得好篇章。

語松竹

庭前芳草綠於袍。堂上詩人欲二毛。多病不禁秋寂寞。雨松風竹莫騷騷。

含山店夢覺作

曾爲流離慣別家。等閒揮袂客天涯。燈前一覺江南夢。惆悵起來山月斜。

題貂黃嶺官軍

散騎蕭蕭下太行，遠從吳會去陳倉。
斜風西雨江亭上，盡日凭欄憶楚鄉。

垣縣山中尋李書記山居不遇留題河次店

白雲紅樹崕嶂，一作繞環東名烏羣飛古畫中。
僊吏不知何處隱，山南山北雨濛濛。

送人遊并汾

風雨蕭蕭欲暮秋，獨攜孤劍塞垣游。
如今虜騎方南牧，莫過陰關第一州。

東陽酒家贈別

送君同上酒家樓，酩酊翻成一笑休。
正是落花饒悵望，醉鄉前路莫回頭。

江外思鄉

年年春日異鄉悲，杜曲黃鶯可得知。
更被夕陽江岸上，斷腸烟柳一絲絲。

夢入關

夢中乘傳過關亭，南望蓮峰簇簇青。
馬上正吟歸去好，覺來江月滿前庭。

送人歸上國

送君江上日西斜，泣向江邊滿樹花。
若見青雲舊相識，爲言流落在天涯。

獨鶴

夕陽灘上立裴回。紅蓼風前雪翅開。應爲不知棲宿處。幾回飛去又飛來。

新栽竹

寂寞階前見此君。透欄吟罷卻沾巾。異鄉流落誰相識。唯有叢篁一作伴似主人。

稻田

綠波春浪滿前陂。極目連雲穰稔肥。更被鷺鷥千點雪。破煙來入畫屏飛。

庭前菊

爲憶長安爛熳開。我今移爾滿庭栽。紅蘭莫笑青青色。曾向龍山泛酒來。

燕來

去歲辭巢別近鄰。今來空訝草堂新。花間對語應相問。不是村中舊主人。

江行西望

西望長安白日遙。半年無事駐蘭橈。欲將張翰秋江雨。畫作屏風寄鮑昭。

衢州江上別李秀才

千山紅樹萬山雲。把酒相看日又曛。一曲離歌兩行淚。更知何地再逢君。

訪潯陽友人不遇

不見安期悔上樓。寂寥人對鷺鷥愁。蘆花雨急江烟暝。何處潺潺獨棹舟。

丙辰年鄜州遇寒食城外醉吟五首

滿街楊柳綠絲煙。畫出清明二月天。好是隔簾花樹動。女郎撩亂送鞦韆。
淮陰寒食足遊人。金鳳羅衣溼麝薰。腸斷入城芳草路。淡紅香白一羣羣。
開元坡下日初斜。拜掃歸來走鈿車。可惜數株紅豔好。不知今夜落誰家。
馬驕風疾玉鞭長。過去唯留一陣香。閑客不須燒破眼。好花皆屬富家郎。

雨絲烟柳欲清明。金屋人閑煖鳳笙。永日迢迢無一事。一作蹴隔街聞築一作氣毬聲。

長于塘別徐茂才

亂離時節別離輕。別酒應須滿滿傾。纔喜相逢又相送。有情爭得似無情。

白牡丹

閨中莫妬新妝婦。陌上須慚傅粉郎。昨夜月明渾似水。入門唯覺一庭香。

憫耕者

何代何王不戰爭。盡從離亂見清平。如今暴骨多於土。猶點鄉兵作戍兵。

壺關道中作

處處兵戈路不通。卻從山北去江東。黃昏欲到壺關寨。正馬寒嘶野草中。

僕者楊金

半年辛苦葺荒居。不獨單寒腹亦虛。努力且爲田舍客。他年爲爾覓金魚。

春陌

滿街芳草卓香車。僊子門前白日斜。腸斷東風各回首。一枝春雪凍梅花。

晏起

爾來中酒起常遲。臥看南山改舊詩。閉戶日高春寂寂。數聲啼鳥上花枝。

幽居春思

綠映紅藏江上村。一聲雞犬似山源。閉門盡日無人到。翠羽春禽滿樹喧。

與小女

見人初解語。嘔啞不肯歸。眠戀小車。一夜嬌啼緣底事。爲嫌衣少縷金花。

虎跡

白額頻頻夜到門。水邊蹤跡漸成羣。我今避世棲岩穴。窟穴如何又見君。

聞回戈軍

上將鏖兵又欲旋。翠華巡幸已三年。營中不用栽楊柳。頭戴儒冠爲控弦。

南鄰公子

南鄰公子夜歸聲。數炬銀燈隔竹明。醉凭馬鬃扶不起。更邀紅袖出門迎。

憶小女銀娘

睦州江上水門西。蕩槳揚帆各解攜。今日天涯夜深坐。斷腸偏憶阿銀犁。

女僕阿汪

念爾辛勤歲已深。亂離相失又相尋。他年待我門如市。報爾千金與萬金。

河清縣河亭

由來多感莫憑高。竟日衷腸似有刀。人事任成陵與谷。大河東去自滔滔。

鍾陵夜闌作

鍾陵風雪夜將深。坐對寒江獨苦吟。流落天涯誰見問。少卿應識子卿心。

殘花

江頭沈醉泥斜暉。卻向花前慟哭歸。惆悵一年春又去。碧雲芳草雨依依。

搖落

搖落秋天酒易醒。淒淒長似別離情。黃昏倚柱不歸去。腸斷綠荷風雨聲。

令狐亭

若非天上神仙宅。須是人間將相家。想得當時好煙月。管弦吹殺後庭花。

江上別李秀才

前年相送灞陵春。今日天涯各避秦。莫向尊前惜沈醉。與君俱是異鄉人。

白櫻桃

王母塔前種幾株。水精簾外看如無。只應漢武金盤上。瀉得珊瑚白露珠。

合歡蓮花

虞舜南巡去不歸。二妃相誓死江湄。空留萬古香魂在。結作雙葩合一枝。

題李斯傳

蜀魄湘魂萬古悲。未悲秦相死秦時。臨刑莫恨倉中鼠。上蔡東門去自遲。

離筵訴酒

感君情重惜分離。送我殷勤酒滿卮。不是不能判酌酹。卻憂前路醉醒時。

贈禮佛名者

何用辛勤禮佛名。我從無得到真庭。尋師六祖傳心印。可是從來讀藏經。

樟亭驛小櫻桃

當年此樹正花開。五馬仙郎載酒來。李白已亡工部死。何人堪伴玉山頽。
宿蓬船

夜來江雨宿蓬船。臥聽淋鈴不忍眠。卻憶紫微情調逸。阻風中酒過年年。

撫州江口雨中作

江上閒衝細雨行。滿衣風灑綠荷聲。金騮掉尾橫鞭望。猶指廬陵半日程。

宜君縣北卜居不遂留題王秀才別墅二首

本期同此臥林邱。榾柮爐前擁布裘。何事卻乘羸馬去。白雲紅樹不相留。

明月嚴霜撲早貂。羨君高臥正逍遙。門前積雪深三尺。火滿紅爐酒滿瓢。

長安舊里

時在華州駕前奉使入蜀作

滿目牆匡春草深。傷時傷事更傷心。車輪馬跡今何在。十二玉樓無處尋。

焦崖閣

李白曾歌蜀道難。長聞白日上青天。今朝夜過焦崖閣。始信星河在馬前。

姬人養蠶

昔年愛笑蠶家婦。今日辛勤自養蠶。仍道不愁羅與綺。女郎初解織桑籃。

多情

一生風月供惆悵。到處煙花恨別離。止竟多情何處好。少年長抱長年悲。

題酒家

酒綠花紅客愛詩。落花春岸酒家旗。尋思避世爲逋客。不醉長醒也是癡。

寄舍弟

每吟富貴他人合。不覺汎瀾又溼衣。萬里日邊鄉樹遠。何年何月得同歸。

春陌

嫩煙輕染柳絲黃。勾引花枝笑凭牆。馬上王孫莫回首。好風偏逐羽林郎。

中酒

南鄰酒熟愛相招。蘸甲傾來綠滿瓢。一醉不知三日事。任他童穉作漁樵。

暴雨

江村入夏多雷雨。曉作狂霖晚又晴。波浪不知深幾許。南湖今與北湖平。

思歸引

越鳥南翔雁北飛。兩鄉雲路各言歸。如何我是飄飄者。獨向江頭戀釣磯。

買酒不得

停樽待爾怪來遲。手挈空餅耗歸。滿面春愁消不得。更看溪鷺寂寥飛。

得故人書

正向溪頭自采蘇。青雲忽得故人書。殷勤問我歸來否。雙闕而今畫不如。

洪州送僧遊福建

八月風波似鼓聲。可堪波上各東西。殷勤早作歸來計。莫戀猿聲住建溪。

春愁

自有春愁正斷魂。不堪芳草思王孫。落花寂寂黃昏雨。深院無人獨倚門。

